

四部備要書目提要

(經部)

冊

一

四部備要書目提要

全四冊實價國幣一元八角  
郵運匯費另加民國廿五年六月上海中華書局編印  
有著作權不許翻印

四部備要書目提要總目

卷一 經部 (第一冊)

十三經古注

周易王韓注

尚書孔傳

毛詩鄭箋

周禮鄭注

儀禮鄭注

禮記鄭注

春秋左氏傳杜氏集解

春秋公羊傳何氏解詁

春秋穀梁傳范氏集解

孝經唐玄宗御注

(頁數下同)

一

二

二

三

三

三

四

四

五

五

論語何氏等集解

五

孟子趙注

五

爾雅郭注

六

十三經注疏

周易正義

六

尚書正義

七

毛詩正義

九

周禮注疏

一〇

儀禮注疏

一一

禮記正義

一四

春秋左傳正義

一六

春秋公羊傳注疏

一七

春秋穀梁傳注疏

一九

孝經注疏

二〇

論語注疏

二一

孟子注疏

二三

爾雅注疏

二四

清十三經注疏

周易述

附江李二氏周易述補

二六

尚書今古文注疏

二八

毛詩傳箋通釋

二九

周禮正義

二九

儀禮正義

三〇

禮記訓纂

三〇

春秋左傳詁

三一

公羊義疏

三一

穀梁補注

三二

孝經鄭注疏

三三

論語正義

三三

孟子正義

三三

爾雅義疏

三四

四書集注

大學

三五

中庸

論語

孟子

小學

說文解字真本

三六

說文繫傳

三八

說文解字段注 附六書音韻表

三九

說文通檢 以上字形

四〇

玉篇

四〇

廣韻

四二

集韻 以上字音

四三

小爾雅義證

四四

方言疏證

四四

廣雅疏證 以上字義

四七

經義

春秋繁露

四八

經義考

四九

經義述聞

五一

卷一 史部 (第一冊)

四部備要書目提要 總目 經部 史部



二十四史

史記

一

(頁數下同)

漢書

七

後漢書

一〇

三國志

一一

晉書

一三

宋書

一四

南齊書

一六

梁書

一七

陳書

一八

魏書

一九

北齊書

二一

周書

二二

隋書

二三

南史

二五

北史

二六

舊唐書

二七

新唐書

二八

舊五代史

二九

新五代史

三一

宋史

三二

遼史

三四

金史

三六

元史

三七

明史

三九

編年

資治通鑑

四〇

通鑑目錄

四二

續資治通鑑

四三

明紀

四四

古史

逸周書

四五

國語

四六

戰國策

四八

山海經箋疏

五〇

竹書紀年

五一

穆天子傳

五三

家語

五三

晏子春秋

五五

越絕書

五六

吳越春秋

五七

列女傳

五八

說苑

六〇

別史

東觀漢記

六一

晉略

六三

雜史

貞觀政要

六四

撫言

六五

宣和遺事

六六

靖康傳信錄

六六

路史

六七

珍傲宋版印

長春真人西遊記

六八

聖武記

六九

載記

華陽國志

六九

十六國春秋

七〇

傳記

高士傳

七一

國朝先正事略

七二

中興將帥別傳

七二

奏議

陸宣公集

即翰苑集

七三

地理

王氏合校水經注

七四

洛陽伽藍記

七六

荆楚歲時記

七七

政書

漢官六種

七八

通志二十略

七九

歷代職官表

八一

吾學錄初編

八三

史評

史通通釋

八三

讀通鑑論

八四

宋論

八五

文史通義

八五

校讎通義

八六

表譜考證

歷代史表

八六

歷代帝王年表

八七

歷代帝王廟諡年諱譜

八八

歷代統紀表疆域表沿革表

八八

歷代紀元編

八八

歷代地理志韻編今釋

八九

廿二史劄記

八九

卷二 子部 (第二冊)

周秦諸子

荀子

一

(頁數下同)

孔叢子

二

孫子

三

吳子

五

司馬法

五

管子

六

慎子

七

商君書

八

鄧析子

九

韓非子

一〇

公孫龍子

一一

尹文子

一二

墨子

一三

鬼谷子

一四

尸子

一五

鶡冠子

一六



燕丹子

一七

呂氏春秋

一八

老子

一九

關尹子

二〇

列子

二一

莊子

二二

文子

二三

文子續義

二四

意林

附別下齋補刻宋本第六卷

二五

儒家

法言

二六

新語

二七

新書

二八

二九

鹽鐵論

三〇

論衡

三一

潛夫論

三二

新論

三三

申鑒

三四

人物志

三五

中說

三六

明夷待訪錄

三七

周子通書

三八

張子全書

三九

二程全書

四〇

朱子大全

四一

象山全集

四二

陽明全書

珍做朱版印

四六

近思錄集注

四七

小學集注

四八

性理精義

四九

五種遺規

五〇

增補宋元學案

五〇

明儒學案

五二

國朝學案小識

五三

國朝漢學師承記

五四

風俗通義

五五

古今注

附中華古今注

五六

翁注困學紀聞

五七

日知錄集釋

五八

十駕齋養新錄

五九

東塾讀書記

六〇

農家

齊民要術

六一

農桑輯要

六二

醫家

素問王冰注

六三

難經集注

六四

神農本草經

六五

傷寒論

六五

金匱要略

六七

靈樞經

六七

算法術數

周髀算經

六九

長術輯要

七〇

易林

七一

太玄經

七三

皇極經世書

七三

雜家

淮南子

七四

抱朴子

七五

顏氏家訓

七六

小說家

博物志

七八

世說新語

七九

續世說

八一

釋道家

弘明集

八一

廣弘明集

八二

參同契考異

八三

諸子大意

子略

八四

卷四 集部

(第四冊)

楚辭

楚辭補注

一 (頁數下同)

漢魏六朝別集

蔡中郎集

三

曹子建集

三

嵇中散集

五

陸士衡集

五

陸士龍集

六

靖節先生集

七

鮑參軍集

八

謝宣城集

九

昭明太子集

一〇

江文通集

一〇

何水部集

一一

庾子山集注

一二

徐孝穆集箋注

一三

唐別集

初唐四傑集

一四

曲江集

一五

李太白詩集

一六

杜工部詩集

一六

王右丞集注

一七

孟襄陽集

一八

元次山集

一九

顏魯公集

二〇

劉隨州集

二一

韋蘇州集

二二

韓昌黎全集

二三

柳河東全集

二五

劉賓客集

二六

孟東野集

二七

長江集

二七



李長吉歌詩

二九

元氏長慶集

三〇

白香山詩集

三一

樊川詩集注

三二

玉谿生詩箋注

三二

樊南文集詳注

三三

樊南文集補編

三三

温飛卿集箋注

三四

魚玄機詩

三五

南唐二主詞

三五

宋別集

騎省集

三六

和靖詩集

三七

蘇學士集

三八

司馬文正集

三九

元豐類藁

三九

宛陵集

四〇

歐陽文忠集

四一

嘉祐集

四二

東坡七集

四二

欒城集

四三

斜川集

四四

臨川集

四五

山谷全集

四六

後山集

四八

淮海集

四九

簡齋集

五〇

誠齋詩集

五一

陸放翁全集

五二

水心集

五五

龍川文集

五六

張子野詞

五七

片玉集

五八

石湖詞

六〇

稼軒詞

六〇

白石道人詩集歌曲

六一

夢窗詞集

六二

蘋州漁笛譜

六三

山中白雲

六三

花外集

六四

金元別集

元遺山詩注

六四

清容居士集

六五

道園學古錄

六六

鐵崖古樂府注

六七

貞居詞

六八

蛻巖詞

六九

明別集

宋文憲全集

六九

青邱詩集注

七〇

遜志齋集

七一

震川文集

七三

清別集

亭林詩文集

七四

南雷文定

七四

薑齋文集

七五

壯悔堂集

七六

吳詩集覽

七六

曝書亭全集

七七

漁洋山人精華錄訓纂

七八

安雅堂詩集

八〇

飴山堂集

八一

蓮洋詩鈔

八二

敬業堂詩集

八三

望溪文集

八四

樊榭山房全集

八五

小倉山房詩文集

八六

東原集

八七

述學內外篇

八八

卷施閣集 更生齋集

八八

儀鄭堂駢體文

八九

惜抱軒全集

九〇

大雲山房全集

九一

茗柯文編

九一

唐確慎集

九二

定盦全集

九三

曾文正詩文集

九三

巢經巢集

九四

定山堂詩餘

九五

珂雪詞

九六

湖海樓詞集

九六

彈指詞

九七

納蘭詞

九八

靈芬館詞四種

九八

總集

文選李善注

九九

六朝文絜

一〇〇

古文辭類纂

一〇一

駢體文鈔

一〇二

續古文辭類纂

一〇三

經史百家雜鈔

一〇四

樂府詩集

一〇四

玉臺新詠

一〇六

古詩選

一〇七

古詩源

一〇八

今體詩鈔

一〇九

十八家詩鈔

一〇九

花閒集

一一〇

草堂詩餘

一一一

絕妙好詞箋

一一二

詞選

一一三

詞綜

一一三

明詞綜

一一四

國朝詞綜

國朝詞綜二集

一一五



國朝詞綜續編

一一六

宋六十名家詞

一一六

十五家詞

一一八

白香詞譜

一一九

元曲選

一一九

詩文評

文心雕龍輯注

一二〇

鍾嶸詩品

一二二

司空詩品

一二二

茗溪漁隱叢話

一二三

說詩碎語

一二四

古文緒論

一二四

鳴原堂論文

一二五

詞律

一二五

佩文詩韻釋要

一二七

詞林韻釋

一二七

(附)

校印緣起

增輯緣起

重印五開本緣起

改印洋裝緣起

識

珍做宋版印

四部備要書目提要卷一（經部）

周易王韓注 十卷

〔著者小傳〕王弼三國魏山陽人字輔嗣少知名好論儒道游才逸

辨注易及老子為尚書郎年二十餘卒 韓伯晉長社人字康伯幼

穎悟及長清和有思理留心文藝其舅殷浩稱為出羣之器仕至吏

部尚書領軍將軍改太常未拜而卒 邢璣（見四庫提要）

〔四庫提要〕上下經註及略例魏王弼撰繫辭傳說卦傳序卦傳雜

卦傳註晉韓康伯撰隋書經籍志以王韓之書各著錄故易註作六

卷略例作一卷繫辭註作三卷舊唐書經籍志新唐書藝文志皆載

弼註七卷蓋合略例計之今本作十卷則併韓書計之也考王儉七

志已稱弼易註十卷案七志今不傳此據陸德明經典釋文所引則併王韓為一書其來

已久矣自鄭玄傳費直之學始析易傳以附經至弼又更定之說者

謂鄭本如今之乾卦其坤卦以下又弼所割裂然鄭氏易註至北宋

尙存一卷崇文總目稱存者爲文言說卦序卦雜卦四篇則鄭本尙以文言自爲一傳所割以附經者不過彖傳象傳今本乾坤二卦各附文言知全經皆弼所更定非鄭氏之舊也每卷所題乾傳第一泰傳第二噬嗑傳第三咸傳第四夬傳第五豐傳第六各以卷首第一卦爲名據王應麟玉海此目亦弼增標蓋因毛氏詩傳之體例相沿既久今亦仍舊文錄之惟經典釋文以泰傳爲需傳以噬嗑傳爲隨傳與今本不同證以開成石經一一與陸氏所述合當由後人以篇頁不均爲之移併以非宏旨之所繫今亦不復追改焉其略例之註爲唐邢璣撰璣里籍無攷其結銜稱四門助教案唐書王鉉傳稱爲鴻臚少卿邢璣子緯以謀反誅則終於鴻臚少卿也太平廣記載其奉使新羅賊殺賈客百餘人掠其珍貨貢於朝其人殊不足道其註則至今附弼書以行陳振孫書錄解題稱蜀本略例有璣所註止有篇首釋略例二字文與此同餘皆不然是宋代尙有一別本今則惟

此本存所謂蜀本者已久佚矣弼之說易源出費直直易今不可見然荀爽易即費氏學李鼎祚書尚頗載其遺說大抵究爻位之上下辨卦德之剛柔已與弼註略近但弼全廢象數又變本加厲耳平心而論闡明義理使易不雜於術數者弼與康伯深爲有功祖尚虛無使易竟入於老莊者弼與康伯亦不能無過瑕瑜不掩是其定評諸儒偏好偏惡皆門戶之見不足據也

〔卷目〕(一)上經乾傳(二)上經泰傳(三)上經噬嗑傳(四)下經咸傳(五)下經夬傳(六)下經豐傳(七)繫辭上(八)繫辭下(九)說卦(十)略例序

### 尚書孔傳 十三卷

〔著者小傳〕孔安國漢人孔子後字子國受詩於申公受尚書於伏生魯共王壞孔子舊宅於壁中得古文尚書及論語孝經皆科斗文字當時無能知者安國以今文讀之承詔作書傳定爲五十八篇以

授都尉朝謂之古文尚書之學又爲古文孝經傳論語訓解武帝朝  
官諫大夫臨淮太守

〔本書略述〕見尚書正義內四庫提要

〔卷目〕(一)(二)虞書(三)夏書(四)(五)商書(六至十三)周書

### 毛詩鄭箋 二十卷

〔著者小傳〕毛亨漢魯人作詩訓詁傳以授毛萇時人謂亨爲大毛

萇爲小毛 毛萇漢趙人受毛亨詩訓詁傳之學爲河間獻王博士

官至北海太守是時言詩者有齊魯韓三家毛詩未得列於學官後

三家皆廢而毛詩乃大行 鄭玄後漢高密人字康成事扶風馬融

三年辭歸融喟然曰鄭生今去吾道東矣既歸客耕東萊門徒千數

百人建寧初黨禍作杜門修業孔融爲北海相深敬之建安中徵爲

大司農尋卒唐貞觀中從祀孔廟所著書凡百餘萬言今存者有毛

詩箋周禮儀禮禮記注其易注及春秋之箴膏肓發墨守起廢疾駁

五經異義皆後人所輯佚書殘缺不完矣經學家稱鄭衆爲先鄭玄爲後鄭

〔本書略述〕見毛詩正義內詩譜序及四庫提要

〔卷目〕(一至八)國風(九至十五)小雅(十六至十八)大雅(十九)

周頌(二十)魯頌

周禮鄭注 四十一卷

〔著者小傳〕鄭玄(見前)

〔本書略述〕見本書原序及周禮注疏內四庫提要

〔卷目〕(一)天官冢宰第一(二至八)冢宰治官之職(九)地官司徒

第二(十至十六)司徒教官之職(十七)春官宗伯第三(十八至

二十七)宗伯禮官之職(二十八)夏官司馬第四(二十九至三

十三)司馬政官之職(三十四)秋官司寇第五(三十五至三十

八)司寇刑官之職(三十九)冬官考工記第六(四十至四十二)



考工記之職

儀禮鄭注 十七卷

〔著者小傳〕鄭玄(見前)

〔本書略述〕見本書原序及儀禮注疏內四庫提要

〔卷目〕(一)士冠禮(二)士昏禮(三)士相見禮(四)鄉飲酒禮(五)

鄉射禮(六)燕禮(七)大射(八)聘禮(九)公食大夫禮(十)覲禮

(十一)喪服(十二)士喪禮(十三)既夕(十四)士虞禮(十五)特

牲饋食禮(十六)少牢饋食禮(十七)有司徹

禮記鄭注 二十卷

〔著者小傳〕鄭玄(見前)

〔本書略述〕見禮記正義內原序及四庫提要

〔卷目〕(一)曲禮(二)(三)檀弓(四)王制(五)月令(六)曾子問文

王世子(七)禮運禮器(八)郊特牲內則(九)玉藻明堂位(十)喪

服小記大傳少儀(十一)學記樂記(十二)雜記(十三)喪大記  
(十四)祭法祭義祭統(十五)經解哀公問仲尼燕居孔子閒居坊  
記(十六)中庸(十七)表記緇衣(十八)奔喪問喪服問閒傳三年  
問深衣(十九)投壺儒行大學(二十)冠義昏義鄉飲酒義射義燕  
義聘義喪服四制

### 春秋左氏傳杜氏集解

三十一卷 附名號歸一圖及  
年表

〔著者小傳〕杜預晉杜陵人字元凱博學多通泰始中爲河南尹秦  
州刺史拜度支尚書嗣拜鎮南大將軍都督荊州諸軍事以平吳功  
封當陽縣侯功成之後耽思經籍爲春秋左氏經傳集解又參考衆  
家譜第謂之釋例又作盟會圖春秋長曆備成一家之學嘗對武帝  
言曰臣有左傳癖卒贈征南大將軍諡成

〔本書略述〕見本書原序及春秋左傳正義內四庫提要

〔卷目〕(一)隱公(二)桓公(三)莊公(四)閔公(五至七)僖公(八)

(九)文公(十)(十一)宣公(十二)(十三)成公(十四至十九)襄公(二十至二十六)昭公(二十七)(二十八)定公(二十九)(三十)哀公首附名號歸一圖及年表

### 春秋公羊傳何氏解詁 二十八卷

〔著者小傳〕何休後漢樊人字邵公質樸訥口而雅有心思精研六經善曆算尤好公羊春秋爲太傅陳蕃所辟蕃敗坐廢錮乃作春秋公羊解詁覃思不闕門者十七年世傳爲何氏學又有公羊墨守左氏膏肓穀梁廢疾等書黨禁解拜議郎光和中卒

〔本書略述〕見本書原序及春秋公羊傳注疏內四庫提要

〔卷目〕(一至三)隱公(四)(五)桓公(六至八)莊公(九)莊公閔公(十至十二)僖公(十三)(十四)文公(十五)(十六)宣公(十七)(十八)成公(十九至二十一)襄公(二十二至二十四)昭公(二十五)(二十六)定公(二十七)(二十八)哀公

春秋穀梁傳范氏集解 二十卷

〔著者小傳〕范甯晉順陽人字武子少篤學官至豫章太守勤學不輟以春秋穀梁未有善釋沈思積年爲之集解其義精審爲世所重

〔本書略述〕見本書原序及穀梁注疏內四庫提要

〔卷目〕(一)(二)隱公(三)(四)桓公(五)莊公(六)莊公閔公(七)至九)僖公(十)(十一)文公(十二)宣公(十三)(十四)成公(十五)(十六)襄公(十七)(十八)昭公(十九)(二十)哀公

孝經唐玄宗御注 九卷

〔著者小傳〕玄宗唐睿宗第三子名隆基封臨淄王英武有才略值韋氏之亂密謀匡復起兵誅韋氏奉父睿宗卽位旋受禪以姚崇宋璟爲相開元之治比於貞觀天寶後安祿山作亂避難奔蜀太子卽位靈武尊帝爲上皇天帝在位四十四年

〔本書略述〕見本書原序及孝經注疏內御製序暨四庫提要

〔卷目〕(一)開宗明義天子(二)諸侯卿大夫士(三)庶人三才(四)

孝治(五)聖治(六)紀孝行五刑廣要道(七)廣至德廣揚名諫諍

(八)感應事君(九)喪親

論語何氏等集解 二十一卷

〔著者小傳〕見本書古註論語姓氏考

〔本書略述〕見本書原序及論語注疏內四庫提要

〔卷目〕(一)學而(二)為政(三)八佾(四)里仁(五)公冶長(六)雍

也(七)述而(八)泰伯(九)子罕(十)鄉黨(十一)先進(十二)顏

淵(十三)子路(十四)憲問(十五)衛靈公(十六)季氏(十七)陽

貨(十八)微子(十九)子張(二十)堯曰

孟子趙注 十四卷

〔著者小傳〕趙岐後漢長陵人初名嘉字臺卿後改名字邠卿永興

初辟司空掾為皮氏長時河東太守為中常侍左悺兄以恥疾宦官

西歸京兆尹延篤辟爲功曹嘗與兄襲得罪中常侍唐衡避旣變姓  
名賣餅北海市衡死乃出徵拜議郎擢太常年九十餘建安中卒有  
孟子章句三輔決錄

〔本書略述〕見本書原序及孟子注疏內孟子題辭解暨四庫提要

〔卷目〕(一)(二)梁惠王(三)(四)公孫丑(五)(六)滕文公(七)

(八)離婁(九)(十)萬章(十一)(十二)告子(十三)(十四)盡心

### 爾雅郭注 十一卷

〔著者小傳〕郭璞晉聞喜人字景純博學高才詞賦爲東京之冠嘗

從郭公受青囊書由是洞知五行天文卜筮之術所占多奇驗避地

過江元帝重之以爲著作佐郎後爲王敦所殺嘗注爾雅山海經三

蒼方言穆天子傳楚辭子虛上林賦又有葬書及玉照定真經都數

十萬言

〔本書略述〕見本書原序及爾雅注疏內四庫提要

〔卷目〕(一)釋詁(二)釋言(三)釋訓釋親(四)釋宮釋器(五)釋樂

釋天(六)釋地釋丘(七)釋山釋水(八)釋草(九)釋木釋蟲(十)

釋魚釋鳥(十一)釋獸釋畜

周易正義 九卷 附經典釋文 一卷

〔著者小傳〕王弼(見前) 韓伯(見前) 孔穎達唐衡水人字仲

達少聰敏記誦日千餘言隋末舉明經煬帝召天下儒官集東都詔

國子祕書學士與論議穎達為冠又年最少老師宿儒恥出其下陰

遣客刺之匿楊玄感家得免入唐累官國子司業遷祭酒嘗受太宗

命撰五經正義即今注疏本之五經疏也卒諡憲 陸德明唐吳縣

人名元朗以字行善名理歷仕陳隋高祖時為國子博士封吳縣男

卒著有經典釋文諸經音讀多恃以為依據

〔四庫提要〕魏王弼晉韓康伯註唐孔穎達疏易本卜筮之書故末

派寢流於讖緯王弼乘其極敝而攻之遂能排擊漢儒自標新學然

隋書經籍志載晉揚州刺史顧夸等有周易難王輔嗣義一卷冊府

元龜又載顧悅之

案悅之即顧夸之字

難王弼易義四十餘條京口閔康之又

申王難顧是在當日已有異同王儉顏延年以後此揚彼抑互詰不休至穎達等奉詔作疏始尊崇王註而衆說皆廢故隋志易類稱鄭學寢微今殆絕矣蓋長孫無忌等作志之時在正義既行之後也今觀其書如復彖七日來復王偶用六日七分之說則推明鄭義之善乾九二利見大人王不用利見九五之說則駁詰鄭義之非於見龍在田時舍也則曰經但云時舍註曰必以時之通舍者則輔嗣以通解舍舍是通義也而不疏舍之何以訓通於天玄而地黃則曰恐莊氏之言非王本意今所不取而不言莊說之何以未允如斯之類皆顯然偏袒至說卦傳之分陰分陽韓註二四爲陰三五爲陽則曰輔嗣以爲初上無陰陽定位此註用王之說帝出乎震韓氏無註則曰益卦六二王用享于帝吉輔嗣註云帝者生物之主興益之宗出震



而齊巽者也則輔嗣之意以此帝爲天帝也是雖弼所未註者亦委曲旁引以就之然疏家之體主於詮解注文不欲有所出入故皇侃禮疏或乖鄭義穎達至斥爲狐不首丘葉不歸根其墨守專門固通例然也至於詮釋文句多用空言不能如諸經正義根據典籍源委粲然則由王註掃棄舊文無古義之可引亦非考證之疏矣此書初名義贊後詔改正義然卷端又題曰兼義未喻其故序稱十四卷唐志作十八卷書錄解題作十三卷此本十卷乃與王韓註本同殆後人從註本合併歟

〔卷目〕(一)上經乾傳(二)上經需傳(三)上經隨傳(四)下經咸傳(五)下經夬傳(六)下經豐傳(七)繫辭上(八)繫辭下(九)說卦  
序卦雜卦附經典釋文一卷

尚書正義 二十一卷

〔著者小傳〕孔安國(見前)孔穎達(見前)

〔四庫提要〕舊本題漢孔安國傳其書至晉豫章內史梅賾始奏於

朝唐貞觀十六年孔穎達等爲之疏永徽四年長孫無忌等又加刊

定孔傳之依託自朱子以來遞有論辯至國朝閻若璩作尚書古文

疏證其事愈明其灼然可據者梅賾尚書考異攻其注禹貢灋水出

河南北山一條積石山在金城西南羌中一條地名皆在安國後朱

彝尊經義考攻其注書序東海駒驪扶餘駘之屬一條謂駒驪王

朱蒙至漢元帝建昭二年始建國安國武帝時人亦不及見若璩則

攻其注泰誓雖有周親不如仁人與所注論語相反又安國傳有湯

誓而注論語予小子履一節乃以爲墨子所引湯誓之文

案安國論語注今佚

此條乃何晏集解所引皆證佐分明更無疑義至若璩謂定從孔傳以孔穎達

之故則不盡然考漢書藝文志敘古文尚書但稱安國獻之遭巫蠱

事未立於學官不云作傳而經典釋文敘錄乃稱藝文志云安國獻

尚書傳遭巫蠱事未立於學官始增入一傳字以證實其事又稱今

以孔氏爲正則定從孔傳者乃陸德明非自穎達惟德明於舜典下注云孔氏傳亡舜典一篇時以王肅注頗類孔氏故取王注從慎徽五典以下爲舜典以續孔傳又云曰若稽古帝舜曰重華協于帝十二字是姚方輿所上孔氏傳本無阮孝緒七錄亦云方輿本或此下更有濬哲文明溫恭允塞玄德升聞乃命以位凡二十八字異聊出之於王注無施也則開皇中雖增入此文尙未增入孔傳中故德明云爾今本二十八字當爲穎達增入耳梅賾之時去古未遠其傳實據王肅之注而附益以舊訓故釋文稱王肅亦注今文所解大與古文相類或肅私見孔傳而祕之乎此雖以末爲本未免倒置亦足見其根據古義非盡無稽矣穎達之疏晁公武讀書志謂因梁費彪疏廣之然穎達原序稱爲正義者蔡大寶巢猗費彪顧彪劉焯劉炫六家而以劉焯劉炫最爲詳雅其書實因二劉非因費氏公武或以經典釋文所列義疏僅彪一家故云然歟朱子語錄謂五經疏周禮最

好詩禮記次之易書爲下其言良允然名物訓故究賴之以有考亦何可輕也

〔卷目〕(一)序(二至四)虞書(五至七)夏書(八至十)商書(十一至二十)周書

### 毛詩正義 七十卷

〔著者小傳〕毛亨(見前) 毛萇(見前) 鄭玄(見前) 孔穎達(見前)

〔四庫提要〕漢毛亨傳鄭玄箋唐孔穎達疏案漢書藝文志毛詩二十九卷毛詩故訓傳三十卷然但稱毛公不著其名後漢書儒林傳始云趙人毛萇傳詩是爲毛詩其長字不從艸隋書經籍志載毛詩二十卷漢河閒太守毛萇傳鄭氏箋於是詩傳始稱毛萇然鄭玄詩譜曰魯人大毛公爲訓詁傳於其家河閒獻王得而獻之以小毛公爲博士陸璣毛詩草木蟲魚疏亦云孔子刪詩授卜商商爲之序以

授魯人曾申申授魏人李克授魯人孟仲子仲子授根牟子根牟  
子授趙人荀卿荀卿授魯國毛亨毛亨作訓詁傳以授趙國毛萇時  
人謂亨爲大毛公萇爲小毛公據是二書則作傳者乃毛亨非毛萇  
故孔氏正義亦云大毛公爲其傳由小毛公而題毛也隋志所云殊  
爲舛誤而流俗沿襲莫之能更朱彝尊經義考乃以毛詩二十九卷  
題毛亨撰注曰佚毛詩訓故傳三十卷題毛萇撰注曰存意主調停  
尤爲於古無據今參稽衆說定作傳者爲毛亨以鄭氏後漢人陸氏  
三國吳人併傳授毛詩淵源有自所言必不誣也鄭氏發明毛義自  
命曰箋博物志曰毛公嘗爲北海郡守康成是此郡人故以爲敬推  
張華所言蓋以爲公府用記郡將用箋之意然康成生於漢末乃修  
敬於四百年前之太守殊無所取按說文曰箋表識書也鄭氏六藝  
論云注詩宗毛爲主毛義若隱略則更表明如有不同卽下己意使  
可識別

案此論今佚此據正義所引

然則康成特因毛傳而表識其傍如今人之

簽記積而成帙故謂之箋無庸別曲說也自鄭箋既行齊魯韓三家

遂廢案此陸德明經典釋文之說然箋與傳義亦時有異同魏王肅作毛詩注毛

詩義駁毛詩奏事毛詩問難諸書以申毛難鄭歐陽修引其釋衛風

擊鼓五章謂鄭不如王見詩本義王基又作毛詩駁以申鄭難王王應麟

引其駁芣苢一條謂王不及鄭見困學紀聞亦載經典釋文晉孫毓作毛詩異同

評復申王說陳統作難孫氏毛詩評又明鄭義並見經典釋文袒分左右垂

數百年至唐貞觀十六年命孔穎達等因鄭箋為正義乃論歸一定

無復岐塗毛傳二十九卷隋志附以鄭箋作二十卷疑為康成所併

穎達等以疏文繁重又析為四十卷其書以劉焯毛詩義疏劉炫毛

詩述義為彙本故能融貫羣言包羅古義終唐之世人無異詞惟王

讜唐語林記劉禹錫聽施士句講毛詩所說維鷄在梁陟彼岵兮勿

翦勿拜維北有斗四義稱毛未注然未嘗有所詆排也至宋鄭樵恃

其才辨無故而發難端南渡諸儒始以掊擊毛鄭為能事元延祐科

舉條制詩雖兼用古注疏其時門戶已成講學者迄不遵用沿及明代胡廣等竊劉瑾之書作詩經大全著爲令典於是專宗朱傳漢學遂亡然朱子從鄭樵之說不過攻小序耳至於詩中訓詁用毛鄭者居多後儒不考古書不知小序自小序傳箋自傳箋闕然佐鬪遂併毛鄭而棄之是非惟不知毛鄭爲何語殆併朱子之傳亦不辨爲何語矣我國家經學昌明一洗前明之固陋乾隆四年皇上特命校刊十三經注疏頒布學宮鼓篋之儒皆駸駸乎研求古學今特錄其書與小序同冠詩類之首以昭六義淵源其來有自孔門師授端緒炳然終不能以他說掩也

〔卷目〕(一之一一至八之三)國風(九之一至十五之三)小雅(十六之一至十八之五)大雅(十九之一至十九之四)周頌(二十之一之二)魯頌(二十之三之四)商頌

周禮注疏

四十一卷

〔著者小傳〕鄭玄（見前）賈公彥唐永年人永徽中官至太學博

士有周禮及儀禮義疏周禮疏尤極博核足以發揮鄭學

〔四庫提要〕漢鄭玄注唐賈公彥疏玄有易注已著錄公彥洛州永

年人永徽中官至太學博士事蹟具舊唐書儒學傳周禮一書上自

河閒獻王於諸經之中其出最晚其真偽亦紛如聚訟不可縷舉惟

橫渠語錄曰周禮是的當之書然其閒必有末世增入者鄭樵通志

引孫處之言曰周公居攝六年之後書成歸豐而實未嘗行蓋周公

之爲周禮亦猶唐之顯慶開元禮預爲之以待他日之用其實未嘗

行也惟其未經行故僅述大略俟其臨事而損益之故建都之制不

與召誥洛誥合封國之制不與武成孟子合設官之制不與周官合

九畿之制不與禹貢合云云案此條所云惟召誥洛誥孟子顯相舛異至禹貢乃唐虞之制武成周官乃梅

蹟古文尙書王制乃漢文帝博士所追述者皆不足以爲難其說蓋離合參半其說差爲近之然亦未盡也

夫周禮作於周初而周事之可考者不過春秋以後其東遷以前三



百餘年官制之沿革政典之損益除舊布新不知凡幾其初去成康未遠不過因其舊章稍爲改易而改易之人不皆周公也於是以後世之法竄入之其書遂雜其後去之愈遠時移勢變不可行者漸多其書遂廢此亦如後世律令條格率數十年而一條脩則必有所附益特世近者可考年遠者無徵其增刪之迹遂靡所稽統以爲周公之舊耳迨乎法制旣更簡編猶在好古者留爲文獻故其書閱久而仍存此又如開元六典政和五禮在當代已不行用而今日尙有傳本不足異也使其作僞何不全僞六官而必闕其一至以千金購之不得哉且作僞者必剽取舊文借真者以實其贗古文尙書是也劉歆宗左傳而左傳所云禮經皆不見於周禮儀禮十七篇皆在七略所載古經七十篇中禮記四十九篇亦在劉向所錄二百十四篇中而儀禮聘禮賓行饗餼之物禾米芻薪之數籩豆簠簋之實劔壺鼎甕之列與掌客之文不同又大射禮天子諸侯侯數侯制與司射之

文不同禮記雜記載子男執圭與典瑞之文不同禮器天子諸侯席數與司几筵之文不同如斯之類與二禮多相矛盾歆果贗託周公爲此書又何難牽就其文使與經傳相合以相證驗而必留此異同以啓後人之攻擊然則周禮一書不盡原文而非出依託可概睹矣考工記稱鄭之刀又稱秦無廬鄭封於宣王時秦封於孝王時其非周公之舊典已無疑義南齊書稱文惠太子鎮雍州有盜發楚王家獲竹簡書青絲編簡廣數分長二尺有奇得十餘簡以示王僧虔僧虔曰是科斗書考工記則其爲秦以前書亦灼然可知雖不足以當冬官然百工爲九經之一共工爲九官之一先王原以制器爲大事存之尙稍見古制俞庭椿以下紛紛割裂五官均無知妄作耳鄭注隋志作十二卷賈疏文繁乃析爲五十卷新舊唐志竝同今本四十二卷不知何人所併玄於三禮之學本爲專門故所釋特精惟好引緯書是其一短歐陽脩集有請校正五經劄子欲刪削其書然緯書

不盡可據亦非盡不可據在審別其是非而已不必竄易古書也又好改經字亦其一失然所注但曰當作某耳尚不似北宋以後連篇累牘動稱錯簡則亦不必苛責於玄矣公彥之疏亦極博核足以發揮鄭學朱子語錄稱五經疏中周禮疏最好蓋宋儒惟朱子深於禮故能知鄭賈之善云

〔卷目〕(一)天官冢宰第一(二至八)冢宰治官之職(九)地官司徒第二(十至十六)司徒教官之職(十七)春官宗伯第三(十八至二十七)宗伯禮官之職(二十八)夏官司馬第四(二十九至三十三)司馬政官之職(三十四)秋官司寇第五(三十五至三十八)司寇刑官之職(三十九)冬官考工記第六(四十至四十二)考工記之職

儀禮注疏 五十卷

〔著者小傳〕鄭玄(見前) 賈公彥(見前)

〔四庫提要〕漢鄭玄注唐賈公彥疏儀禮出殘闕之餘漢代所傳凡

有三本一曰戴德本以冠禮第一昏禮第二相見第三士喪第四既夕第五士虞第六特牲第七少牢第八有司徹第九鄉飲酒第十鄉射第十一燕禮第十二大射第十三聘禮第十四公食第十五覲禮第十六喪服第十七一曰戴聖本亦以冠禮第一昏禮第二相見第三其下則鄉飲第四鄉射第五燕禮第六大射第七士虞第八喪服第九特牲第十少牢第十一有司徹第十二士喪第十三既夕第十四聘禮第十五公食第十六覲禮第十七一曰劉向別錄本卽鄭氏所注賈公彥疏謂別錄尊卑吉凶次第倫序故鄭用之二戴尊卑吉凶雜亂故鄭不從之也其經文亦有二本高堂生所傳者謂之今文魯恭王壞孔子宅得亡儀禮五十六篇其字皆以篆書之謂之古文玄注參用二本其從今文而不從古文者則今文大書古文附注士冠禮闌西闕外句注古文闌爲藜闕爲蹙是也從古文而不從今文

者則古文大書今文附注士冠禮醴辭孝友時格句注今文格爲嘏是也其書自玄以前絕無注本玄後有王肅注十七卷見於隋志然賈公彥序稱周禮注者則有多門儀禮所注後鄭而已則唐初肅書已佚也爲之義疏者有沈重見於北史又有無名氏二家見於隋志然皆不傳故賈公彥僅據齊黃慶隋李孟慙二家之疏定爲今本其書自明以來刻本舛譌殊甚顧炎武日知錄曰萬曆北監本十三經中儀禮脫誤尤多士昏禮脫壻授綏姆辭曰未教不足與爲禮也一節十四字賴有長安石經據以補此一節而其注疏遂亡鄉射禮脫士鹿中翻旌以獲七字士虞禮脫哭止告事畢賓出七字特性饋食禮脫舉觶者祭卒觶拜長者答拜十一字少牢饋食禮脫以授尸坐取簞與七字此則秦火之所未亡而亡於監刻矣云云蓋由儀禮文古義奧傳習者少注釋者亦代不數人寫刻有譌粹不能校故紕漏至於如是也今參考諸本一一釐正著於錄焉

〔卷目〕(一至三)士冠禮第一(四至六)士昏禮第二(七)士相見禮  
第三(八至十)鄉飲酒禮第四(十一至十三)鄉射禮第五(十四)  
(十五)燕禮第六(十六至十八)大射第七(十九至二十四)聘禮  
第八(二十五至二十六上)公食大夫禮第九(二十六下)(二十  
七)覲禮第十(二十八至三十四)喪服第十一(三十五至三十七)  
士喪禮第十二(三十八至四十一)既夕禮第十三(四十二)(四  
十三)士虞禮第十四(四十四至四十六)特牲饋食禮第十五  
(四十七)(四十八)少牢饋食禮第十六(四十九)(五十)有司第  
十七

禮記正義

六十三卷

〔著者小傳〕鄭玄(見前) 孔穎達(見前)

〔四庫提要〕漢鄭玄注唐孔穎達疏隋書經籍志曰漢初河閒獻王

得仲尼弟子及後學者所記一百三十一篇獻之時無傳之者至劉

向考校經籍檢得一百三十篇第而敘之又得明堂陰陽記三十三篇孔子三朝記七篇王史氏記二十一篇樂記二十三篇凡五種合二百十四篇戴德刪其煩重合而記之爲八十五篇謂之大戴記而戴聖又刪大戴之書爲四十六篇謂之小戴記漢末馬融遂傳小戴之學融又益月令一篇明堂位一篇樂記一篇合四十九篇云云其說不知所本今考後漢書橋元傳云七世祖仁著禮記章句四十九篇號曰橋君學仁卽班固所謂小戴授梁人橋季卿者成帝時嘗官大鴻臚其時已稱四十九篇無四十六篇之說又孔疏稱別錄禮記四十九篇樂記第十九四十九篇之首疏皆引鄭目錄鄭目錄之末必云此於劉向別錄屬某門月令目錄云此於別錄屬明堂陰陽記明堂位目錄云此於別錄屬明堂陰陽記樂記目錄云此於別錄屬樂記蓋十一篇今爲一篇則三篇皆劉向別錄所有安得以爲馬融所增疏又引玄六藝論曰戴德傳記八十五篇則大戴禮是也戴聖

傳禮四十九篇則此禮記是也玄爲馬融弟子使三篇果融所增玄不容不知豈有以四十九篇屬於戴聖之理況融所傳者乃周禮若小戴之學一授橋仁一授楊榮後傳其學者有劉祐高誘鄭玄盧植融絕不預其授受又何從而增三篇乎知今四十九篇實戴聖之原書隋志誤也元延祐中行科舉法定禮記用鄭玄注故元儒說禮率有根據自明永樂中敕修禮記大全始廢鄭注改用陳澔集說禮學遂荒然研思古義之士好之者終不絕也爲之疏義者唐初尙存皇侃熊安生二家

案明北監本以皇侃爲皇甫侃以熊安生爲熊安二人姓名並誤足徵校刊之疎謹附訂於此貞觀

中敕孔穎達等修正義乃以皇氏爲本以熊氏補所未備穎達序稱熊則違背本經多引外義猶之楚而北行馬雖疾而去愈遠又欲釋經文惟聚難義猶治絲而棼之手雖繁而絲益亂也皇氏雖章句詳正微稍繁廣又旣遵鄭氏乃時乖鄭義此是木落不歸其本狐死不首其邱此皆二家之弊未爲得也故其書務伸鄭注未免有附會之



處然採撫舊文詞富理博說禮之家鑽研莫盡譬諸依山鑄銅煮海  
爲鹽卽衛湜之書尙不能窺其涯涘陳澧之流益如莛與楹矣

〔卷目〕(一至三)曲禮上(四)(五)曲禮下(六至八)檀弓上(九)

(十)檀弓下(十一至十三)王制(十四至十七)月令(十八)(十

九)曾子問(二十)文王世子(二十一)(二十二)禮運(二十三)

(二十四)禮器(二十五)(二十六)郊特牲(二十七)(二十八)

內則(二十九)(三十)玉藻(三十一)明堂位(三十二)(三十三)

喪服小記(三十四)大傳(三十五)少儀(三十六)學記(三十七

至三十九)樂記(四十)(四十一)雜記上(四十二)(四十三)雜

記下(四十四)喪大記(四十五)喪服大記(四十六)祭法(四十

七)(四十八)祭義(四十九)祭統(五十)經解哀公問仲尼燕居

(五十一)孔子閒居坊記(五十二)(五十三)中庸(五十四)表記

(五十五)緇衣(五十六)奔喪問喪(五十七)服問閒傳(五十八)

三年問深衣投壺(五十九)儒行(六十)大學(六十一)冠義昏義  
鄉飲酒(六十二)射義燕義(六十三)聘義喪服四制

### 春秋左傳正義

六十卷

(著者小傳)杜預(見前) 孔穎達(見前)

(四庫提要)周左丘明傳晉杜預注唐孔穎達疏自劉向劉歆桓譚  
班固皆以春秋傳出左丘明左丘明受經於孔子魏晉以來儒者更  
無異議至唐趙匡始謂左氏非丘明蓋欲攻傳之不合經必先攻作  
傳之人非受經於孔子與王柏欲攻毛詩先攻毛詩不傳於子夏其  
智一也宋元諸儒相繼竝起王安石有春秋解一卷證左氏非丘明  
者十一事陳振孫書錄解題謂出依託今未見其書不知十一事者  
何據其餘辨論惟朱子謂虞不臘矣爲秦人之語葉夢得謂紀事終  
於智伯當爲六國時人似爲近理然考史記秦本紀稱惠文君十二  
年始臘張守節正義稱秦惠文王始效中國爲之明古有臘祭秦至

是始用非至是始創闢若璩古文尙書疏證亦駁此說曰史稱秦文公始有史以記事秦宣公初志閏月豈亦中國所無待秦獨創哉則臘爲秦禮之說未可據也左傳載預斷禍福無不徵驗蓋不免從後傳合之惟哀公九年稱趙氏其世有亂後竟不然是未見後事之證也經止獲麟而弟子續至孔子卒傳載智伯之亡殆亦後人所續史記司馬相如傳中有揚雄之語不能執是一事指司馬遷爲後漢人也則載及智伯之說不足疑也今仍定爲左丘明作以祛衆惑至其作傳之由則劉知幾躬爲國史之言最爲確論疏稱大事書於策者經之所書小事書於簡者傳之所載觀晉史之書趙盾齊史之書崔杼及甯殖所謂載在諸侯之籍者其文體皆與經合墨子稱周春秋載杜伯燕春秋載莊子儀宋春秋載衎觀辜齊春秋載王里國中里覈其文體皆與傳合經傳同因國史而修斯爲顯證知說經去傳爲舍近而求諸遠矣漢志載春秋古經十二篇經十一卷注曰公羊穀

梁二家則左氏經文不著於錄然杜預集解序稱分經之年與傳之年相附比其義類各隨而解之陸德明經典釋文曰舊夫子之經與丘明之傳各異杜氏合而釋之則左傳又自有經考漢志之文既曰古經十二篇矣不應復云經十一卷觀公穀二傳皆十一卷與經十一卷相配知十一卷爲二傳之經故有是注徐彥公羊傳疏曰左氏先著竹帛故漢儒謂之古學則所謂古經十二篇卽左傳之經故謂之古刻漢書者誤連二條爲一耳今以左傳經文與二傳校勘皆左氏義長知手錄之本確於口授之本也言左傳者孔奇孔嘉之說久佚不傳賈逵服虔之說亦僅偶見他書今世所傳惟杜注孔疏爲最古杜注多強經以就傳孔疏亦多左杜而右劉

案劉炫作規過以攻杜解凡所駁正孔疏

皆以爲非

是皆篤信專門之過不能不謂之一失然有注疏而後左氏之

義明左氏之義明而後二百四十二年內善惡之跡一一有徵後儒妄作聰明以私臆談褒貶者猶得據傳文以知其謬則漢晉以來藉

左氏以知經義宋元以後更藉左氏以杜臆說矣傳與注疏均謂有大功於春秋可也

〔卷目〕(一)春秋序(二至四)隱公(五至七)桓公(八至十)莊公

(十一)閔公(十二至十七)僖公(十八至二十)文公(二十一至

二十四)宣公(二十五至二十八)成公(二十九至四十)襄公

(四十一至五十三)昭公(五十四至五十六)定公(五十七至六

十)哀公

### 春秋公羊傳注疏 二十八卷

〔著者小傳〕何休(見前)徐彥時代無可考四庫提要從董道之說

定為唐人

〔四庫提要〕漢公羊壽傳何休解詁唐徐彥疏案漢書藝文志公羊

傳十一卷班固自注曰公羊子齊人案漢藝文志不題顏師古顏師古

注曰名高案此據春秋說題詞徐彥疏引戴宏序曰子夏傳與公羊

案此據春秋說題詞

高高傳與其子平平傳與其子地地傳與其子敢敢傳與其子壽至

漢景帝時壽乃與齊人胡母子都著於竹帛何休之注亦同

休說見隱公二

年紀子伯莒子盟於密條下

今觀傳中有子沈子曰子司馬子曰子女子曰子北

宮子曰又有高子曰魯子曰蓋皆傳授之經師不盡出於公羊子定

公元年傳正棺於兩楹之閒二句穀梁傳引之直稱沈子不稱公羊

是併其不著姓氏者亦不盡出公羊子且併有子公羊子曰尤不出

於高之明證知傳確爲壽撰而胡母子都助成之舊本首署高名蓋

未審也又羅璧識遺稱公羊穀梁自高亦作傳外更不見有此姓萬

見春謂皆姜字切韻脚疑爲姜姓假託案鄒爲邾婁披爲勃鞞木爲

彌牟殖爲舌職記載音譌經典原有是事至弟子記其先師子孫述

其祖父必不至竟迷本字別用合聲璧之所言殊爲好異至程端學

春秋本義竟指高爲漢初人則講學家臆斷之詞更不足與辨矣三

傳與經文漢志皆各爲卷帙以左傳附經始於杜預公羊傳附經則

不知始自何人觀何休解詁但釋傳而不釋經與杜異例知漢末猶自別行今所傳蔡邕石經殘字公羊傳亦無經文足以互證今本以傳附經或徐彥作疏之時所合併歟彥疏文獻通考作三十卷今本乃止二十八卷或彥本以經文併爲二卷別冠於前後人又散入傳中故少此二卷亦未可知也彥疏唐志不載崇文總目始著錄稱不著撰人名氏或云徐彥董道廣川藏書志亦稱世傳徐彥不知時代意其在貞元長慶之後考疏中郊之戰一條猶及見孫炎爾雅注完本知在宋以前又葬桓王一條全襲用楊士勳穀梁傳疏知在貞觀以後中多自設問答文繁語複與邱光庭兼明書相近亦唐末之文體董道所云不爲無理故今從道之說定爲唐人焉

〔卷目〕(一至三)隱公(四)(五)桓公(六至八)莊公(九)莊公閔公

(十至十二)僖公(十三)(十四)文公(十五)(十六)宣公(十七)

(十八)成公(十九至二十一)襄公(二十二至二十四)昭公(二

十五) (二十六) 定公 (二十七) (二十八) 哀公

春秋穀梁傳注疏 二十卷

〔著者小傳〕范甯(見前) 楊士勳時代無可考四庫提要定為唐

貞觀時人

〔四庫提要〕晉范甯集解唐楊士勳疏其傳則士勳疏稱穀梁子名

倂字元始一名赤受經於子夏為經作傳則當為穀梁子所自作徐

彥公羊傳疏又稱公羊高五世相授至胡母生乃著竹帛題其親師

故曰公羊傳穀梁亦是著竹帛者題其親師故曰穀梁傳則當為傳

其學者所作案公羊傳定公即位一條引子沈子曰何休解詁以為

後師案此注在隱公十一年所引子沈子條下此傳定公即位一條亦稱沈子曰公羊穀

梁既同師子夏不應及見後師又初獻六羽一條稱穀梁子曰傳既

穀梁自作不應自引己說且此條又引尸子曰尸佼為商鞅之師鞅

既誅佼逃於蜀其人亦在穀梁後不應預為引據疑徐彥之言為得



其實但誰著於竹帛則不可考耳漢書藝文志載公羊穀梁二家經十一卷傳亦各十一卷則經傳初亦別編范甯集解乃併經注之疑卽甯之所合定公元年春王三月一條發傳於春王二字之下以三月別屬下文頗疑其割裂然考劉向說苑稱文王似元年武王似春王周公似正月向受穀梁春秋知穀梁經文以春王二字別爲一節故向有此讀至公觀魚于棠一條葬桓王一條杞伯來逆叔姬之喪以歸一條曹伯廬卒于師一條天王殺其弟佖夫一條皆冠以傳曰字惟桓王一條與左傳合餘皆不知所引何傳疑甯以傳附經之時每條皆冠以傳曰字如鄭玄王弼之易有彖曰象曰之例後傳寫者刪之此五條其削除未盡者也甯注本十二卷以兼載門生故吏子弟之說各列其名故曰集解晉書本傳稱甯此書爲世所重旣而徐邈復爲之注世亦稱之今考書中乃多引邈注未詳其故又自序有商略名例之句疏稱甯別有略例百餘條此本不載然注中時有傳

例曰字或士勛割裂其文散入注疏中歟士勛始末不可考孔穎達左傳正義序稱與故四門博士楊士勛參定則亦貞觀中人其書不及穎達書之賅洽然諸儒言左傳者多言公穀者少既乏憑藉之資又左傳成於衆手此書出於一人復鮮佐助之力詳略殊觀固其宜也其疏長狄眉見於軾一條連綴於身橫九畝向下與注相離蓋邢曷刊正之時又多失其原第亦不盡士勛之舊矣

〔卷目〕(一)(二)隱公(三)(四)桓公(五)(六)莊公閔公(七至九)僖公(十)(十一)文公(十二)宣公(十三)(十四)成公(十五)(十六)襄公(十七)(十八)昭公(十九)定公(二十)哀公

### 孝經注疏 九卷

〔著者小傳〕玄宗(見前) 邢曷宋濟陰人字叔明太宗時擢九經及第真宗時召曷與杜鎬孫奭等校定三禮三傳孝經論語爾雅等書義疏官終禮部尚書

〔四庫提要〕唐玄宗明皇帝御註宋邢昺疏案唐會要開元十年六月上註孝經頒天下及國子學天寶二年五月上重註亦頒天下舊唐書經籍志孝經一卷玄宗註唐書藝文志今上孝經制旨一卷註曰玄宗其稱制旨者猶梁武帝中庸義之稱制旨實一書也趙明誠金石錄載明皇註孝經四卷陳振孫書錄解題亦稱家有此刻爲四大軸蓋天寶四載九月以御註刻石於太學謂之石臺孝經今尙在西安府學中爲碑凡四故拓本稱四卷耳玄宗御製序末稱一章之中凡有數句一句之內義有兼明具載則文繁略之則義闕今存於疏用廣發揮唐書元行沖傳稱玄宗自註孝經詔行沖爲疏立於學官唐會要又載天寶五載詔孝經書疏雖麤發明未能該備今更敷暢以廣闕文令集賢院寫頒中外是註凡再修疏亦再修其疏唐志作二卷宋志則作三卷殆續增一卷歟宋咸平中邢昺所修之疏卽據行沖書爲藍本然孰爲舊文孰爲新說今已不可辨別矣孝經有

今文古文二本今文稱鄭玄註其說傳自荀昶而鄭志不載其名古文稱孔安國註其書出自劉炫而隋書已言其僞至唐開元七年三月詔令羣儒質定右庶子劉知幾主古文立十二驗以駁鄭國子祭酒司馬貞主今文摘闈門章文句凡鄙庶人章割裂舊文妄加子曰字及註中脫衣就功諸語以駁孔其文具載唐會要中厥後今文行而古文廢元熊禾作董鼎孝經大義序遂謂貞去闈門一章卒啓玄宗無禮無度之禍明孫本作孝經辨疑併謂唐宮闈不肅貞劄闈門一章乃爲國諱夫削闈門一章遂啓幸蜀之衅使當時行用古文果無天寶之亂乎唐宮闈不肅誠有之至於闈門章二十四字則絕與武韋不相涉指爲避諱不知所避何諱也况知幾與貞兩議竝上會要載當時之詔乃鄭依舊行用孔註傳習者稀亦存繼絕之典是未因知幾而廢鄭亦未因貞而廢孔迨時閱三年乃有御註太學刻石署名者三十六人貞不預列御註旣行孔鄭兩家遂併廢亦未聞貞

更建議廢孔也禾等徒以朱子刊誤偶用古文遂以不用古文爲大罪又不能知唐時典故徒聞中興書目有議者排毀古文遂廢之語遂沿其誤說憤憤然歸罪於貞不知以註而論則孔佚鄭亦佚孔佚罪貞鄭佚又罪誰乎以經而論則鄭存孔亦存古文並未因貞一議亡也貞又何罪焉今詳考源流明今文之立自玄宗此註始玄宗此註之立自宋詔邢昺等修此疏始衆說喧呶皆揣摩影響之談置之不論不議可矣

〔卷目〕(一)開宗明義章天子章(二)諸侯章卿大夫章士章(三)庶人章三才章(四)孝治章(五)聖治章(六)紀孝行章五刑章廣要道章(七)廣至德章廣揚名章諫諍章(八)感應章事君章(九)喪親章

論語注疏 二十一卷

〔著者小傳〕何晏(見前) 邢昺(見前)

〔四庫提要〕魏何晏註宋邢昺疏昺字叔明曹州濟陰人太平興國中擢九經及第官至禮部尙書事蹟具宋史本傳是書蓋咸平二年詔昺改定舊疏頒列學官至今承用而傳刻頗譌集解所引十三家今本各題曰某氏皇侃義疏則均題其名案奏進序中稱集諸家之善記其姓名侃疏亦曰何集註皆呼人名惟包獨言氏者包名咸何家諱咸故不言也與序文合知今本爲後來刊版之省文然周氏與周生烈遂不可分殊不如皇本之有別考邢昺疏中亦載皇侃何氏諱咸之語其疏記其姓名句則云註但記其姓而此連言名者以著其姓所以名其人非謂名字之名也是昺所見之本已惟題姓故有是曲說七經孟子考文稱其國皇侃義疏本爲唐代所傳是亦一證矣其文與皇侃所載亦異同不一大抵互有短長如學而篇不患人之不己知章皇疏有王肅註一條里仁篇君子之於天下也章皇疏有何晏註一條今本皆無觀顧炎武石經考以石經儀禮校監版或

併經文全節漏落則今本集解傳刻佚脫蓋所不免然蔡邕石經論語於而在蕭牆之內句兩本竝存見於隸釋陸德明經典釋文於諸本同異亦皆竝存蓋唐以前經師授受各守專門雖經文亦不能盡一無論註文固不必以此改彼亦不必以彼改此今仍從今本錄之所以各存其舊也曷疏宋志作十卷今本二十卷蓋後人依論語篇第析之晁公武讀書志稱其亦因皇侃所採諸儒之說刊定而成今觀其書大抵翦皇氏之枝蔓而稍傳以義理漢學宋學茲其轉關是疏出而皇疏微迨伊洛之說出而是疏又微故中興書目曰其書於章句訓詁名物之際詳矣蓋微言其未造精微也然先有是疏而後講學諸儒得沿溯以窺其奧祭先河而後海亦何可以後來居上遂盡廢其功乎

〔卷目〕(一)學而(二)爲政(三)八佾(四)里仁(五)公冶長(六)雍也(七)述而(八)泰伯(九)子罕(十)鄉黨(十一)先進(十二)顏

淵(十三)子路(十四)憲問(十五)衛靈公(十六)季氏(十七)陽貨(十八)微子(十九)子張(二十)堯曰

孟子注疏 十四卷

〔著者小傳〕趙岐(見前) 孫奭宋博平人字宗古九經及第累官

龍圖閣待制奭以經術進守道自處有所言未嘗阿附嘗撥五經切於治道者爲經典微言又撰崇祀錄樂記圖五經節解五服制度諸篇以太子少傅致仕卒諡宣

〔四庫提要〕漢趙岐註其疏則舊本題宋孫奭撰岐字邠卿京北長陵人初名嘉字臺卿永興二年辟司空掾遷皮氏長延熹元年中常侍唐衡兄珰爲京北尹與岐夙隙岐避禍逃避四方乃自改名字後遇赦得出拜并州刺史又遭黨錮十餘歲中平元年徵拜議郎舉燉煌太守後遷太僕終太常事蹟具後漢書本傳奭字宗古博平人太宗端拱中九經及第仁宗時官至兵部侍郎龍圖閣學士事蹟具宋



史本傳是註卽岐避難北海時在孫賓家夾柱中所作漢儒註經多  
明訓詁名物惟此註箋釋文句乃似後世之口義與古學稍殊然孔  
安國馬融鄭玄之註論語今載於何晏集解者體亦如是蓋易書文  
皆最古非通其訓詁則不明詩禮語皆徵實非明其名物亦不解論  
語孟子詞旨顯明惟闡其義理而止所謂言各有當也其中如謂宰  
子子貢有若緣孔子聖德高美而感稱之孟子知其太過故貶謂之  
污下之類紕繆殊甚以屈原憔悴爲徵於色以甯戚扣角爲發於聲  
之類亦比擬不倫然朱子作孟子集註或問於岐說不甚掊擊至於  
書中人名惟益成括告子不從其學於孟子之說季孫子叔不從其  
二弟子之說餘皆從之書中字義惟折枝訓按摩之類不取其說餘  
亦多取之蓋其說雖不及後來之精密而開闢荒蕪俾後來得循途  
而深造其功要不可泯也胡燝拾遺錄據李善文選註引孟子曰墨  
子兼愛摩頂致於踵趙岐曰致至也知今本經文及註均與唐本不

同今證以孫奭音義所音岐註亦多不相應語詳孟子音義條下蓋已非舊本

至於盡心下篇夫子之設科也註稱孟子曰夫我設教授之科云云

則顯爲予字今本乃作夫子又萬子曰句註稱萬子萬章也則顯爲

予字今本乃作萬章是又註文未改而經文誤刊者矣其疏雖稱孫

奭作而朱子語錄則謂邵武士人假託蔡季通識其人今考宋史邢

昺傳稱昺於咸平二年受詔與杜鎬舒雅孫奭李慕清崔偓佺等校

定周禮儀禮公羊穀梁春秋傳孝經論語爾雅義疏不云有孟子正

義涑水紀聞載奭所定著有論語孝經爾雅正義亦不云有孟子正

義其不出奭手確然可信其疏皆敷衍語氣如鄉塾講章故朱子語

錄謂其全不似疏體不曾解出名物制度只繞纏趙岐之說至岐註

好用古事爲比疏多不得其根據如註謂非禮之禮若陳質娶妻而

長拜之非義之義若藉交報讎此誠不得其出典案藉交報讎似謂藉交游之力以報

讎如朱家郭解非有人姓藉名至於單豹養其內而虎食其外事出

莊子亦不能舉則弁陋太甚朱彝尊經義考摘其欲見西施者人輸

金錢一文事詭稱史記今考註以尾生為不虞之譽以陳不瞻為求

全之毀疏亦竝稱史記尾生事實見莊子陳不瞻事實見說苑案說苑作

陳不占蓋古字同音假借皆史記所無如斯之類益影撰無稽矣以久列學官姑

仍舊本錄之爾

〔卷目〕(一上至二下)梁惠王(三上至四下)公孫丑(五上至六下)

滕文公(七上至八下)離婁(九上至十下)萬章(十一上至十二

下)告子(十三上至十四下)盡心

### 爾雅注疏 十卷

〔著者小傳〕郭璞(見前) 邢昺(見前)

〔四庫提要〕晉郭璞註宋邢昺疏璞字景純河東聞喜人官至弘農

太守事蹟具晉書本傳昺有孝經疏已著錄案大戴禮孔子三朝記

稱孔子教魯哀公學爾雅則爾雅之來遠矣然不云爾雅為誰作據

張揖進廣雅表稱周公著爾雅一篇案經典釋文以揖所稱一篇為釋詁今俗所傳三

篇案漢志爾雅三卷此三篇謂三卷也或言仲尼所增或言子夏所益或言叔孫通所

補或言沛郡梁文所考皆解家所說疑莫能明也於作書之人亦無

確指其餘諸家所說小異大同今參互而考之郭璞爾雅註序稱豹

鼠既辨其業亦顯邢昺疏以為漢武帝時終軍事七錄載犍為文學

爾雅註三卷案七錄久佚此據隋志所稱梁有某書亡知為七錄所載陸德明經典釋文以為漢

武帝時人則其書在武帝以前曹粹中放齋詩說曰案此書今未見傳本此據永樂

大典所引爾雅毛公以前其文猶略至鄭康成時則加詳如學有緝熙于

光明毛公云光廣也康成則以為學於有光明者而爾雅曰緝熙光

明也又齊子豈弟康成以為猶言發夕也而爾雅曰豈弟發也薄言

觀者毛公無訓振古如茲毛公云振自也康成則以觀為多以振為

古其說皆本於爾雅使爾雅成書在毛公之前顧得為異哉則其書

在毛亨以後案詩傳乃毛亨作非毛萇作語詳詩正義條下大抵小學家綴緝舊文遞相增

益周公孔子皆依託之詞觀釋地有鷦鷯釋鳥又有鷽鷽同文復出知非纂自一手也其書歐陽修詩本義以爲學詩者纂集博士解詁高承事物紀原亦以爲大抵解詁詩人之旨然釋詩者不及十之一非專爲詩作揚雄方言以爲孔子門徒解釋六藝王充論衡亦以爲五經之訓故然釋五經者不及十之三四更非專爲五經作今觀其文大抵採諸書訓詁名物之同異以廣見聞實自爲一書不附經義如釋天云暴雨謂之凍釋艸云卷施艸拔心不死此取楚辭之文也釋天云扶搖謂之焱釋蟲云蒺藜蝨蛆此取莊子之文也釋詁云嫁往也釋水云灋大出尾下此取列子之文也釋地四極云西王母釋畜云小領盜驪此取穆天子傳之文也釋地云東方有比目魚焉不比不行其名謂之鱧鱧南方有比翼鳥焉不比不飛其名謂之鷽鷽此取管子之文也又云邛邛距虛負而走其名謂之歷此取呂氏春秋之文也又云北方有比肩民焉迭食而迭望釋地云河出崑崙虛

此取山海經之文也釋詁云天帝皇王后辟公侯又云洪廓宏溥介  
純夏幘釋天云春爲青陽至謂之醴泉此取尸子之文也釋鳥曰爰  
居雜縣此取國語之文也如是之類不可殫數蓋亦方言急就之流  
特說經之家多資以證古義故從其所重列之經部耳璞時去漢未  
遠如遂幘大東稱詩釗我周王稱逸書所見尙多古本故所註多可  
據後人雖迭爲補正然宏綱大旨終不出其範圍曷疏亦多能引證  
如尸子廣澤篇仁意篇皆非今人所及睹其犍爲文學樊光李巡之  
註見於陸氏釋文者雖多所遺漏然疏家之體惟明本註註所未及  
不復旁搜此亦唐以來之通弊不能獨責於曷惟旣列註文而疏中  
時複述其文但曰郭註云云不異一字亦更不別下一語殆不可解  
豈其初疏與註別行歟今未見原刻不可復考矣

〔卷目〕(一)(二)釋詁(三)釋言(四)釋訓釋親(五)釋宮釋器釋樂

(六)釋天(七)釋地釋丘釋山釋水(八)釋草(九)釋木釋蟲釋魚

(十)釋鳥獸釋畜

# 周易述

二十一卷

〔著者小傳〕惠棟清元和人字定字號松崖人稱小紅豆元和學生員自幼篤志向學於經史諸子稗官野乘及七經絳緯之學無所不通家貧課徒自給行義至高乾隆中大臣薦經明行修索所著書未及進呈罷歸卒年六十二棟於諸經熟洽貫串尤邃於易嘗追考漢儒易學發明易之本例撰易漢學周易述易微言易例又以古音古字非經師不能辨撰九經古義又有明堂大道錄禘說古文尙書考後漢書補注王士禎精華錄訓纂九曜齋筆記松崖文鈔諸史會最竹南漫錄諸書錢大昕謂擬諸前儒當在何休服虔之閒馬融趙岐輩不及也

〔四庫提要〕國朝惠棟撰棟字定字號松崖元和人其書主發揮漢儒之學以荀爽虞翻爲主而參以鄭玄宋咸干寶諸家之說融會其

義自爲注而自疏之其目錄凡四十卷自一卷至二十一卷皆訓釋  
經文二十二卷二十三卷爲易微言皆雜鈔經典論易之語二十四  
卷至四十卷凡載易大義易例易法易正譌明堂大道錄禘說六名  
皆有錄無書其注疏尙闕下經十四卷及序卦雜卦兩傳蓋未完之  
書其易微言二卷亦皆雜錄舊說以備參考他時蕝事則此爲當棄  
之糟粕非欲別勒一篇附諸注疏之末故其文皆未詮次棟歿之後  
其門人過尊師說并未定殘藁而刻之實非棟本意也自王弼易行  
漢學遂絕宋元儒者類以意見揣測去古寢遠中閒言象數者又岐  
爲圖書之說其書愈衍愈繁而未必皆四聖之本旨故說經之家莫  
多於易與春秋而易尤叢雜棟能一一原本漢儒推闡考證雖掇拾  
散佚未能備睹專門授受之全要其引據古義具有根柢視空談說  
經者則相去遠矣

〔卷目〕(一至四)上經(五至七)下經(八)彖上傳(九)彖下傳(十)



(十一)象上傳(十二)(十三)象下傳(十四)(十五)繫辭上傳  
(十六)(十七)繫辭下傳(十八)文言傳(十九)說卦傳(二十)易  
微言上(二十一)易微言下

### 周易述補

江本四卷 李本五卷

〔著者小傳〕江藩清甘泉人字子屏號鄭堂監生少受學於惠棟余  
蕭客江聲三人博綜羣經尤熟於史事有國朝漢學師承記經師經  
義目錄甄錄清代諸儒及諸家撰述一以篤守漢儒家法者爲斷又  
有國朝宋學淵源記周易述補隸經文爲文自言無入家氣有炳燭  
室雜文 李林松清上海人字仲熙號心庵嘉慶進士官戶部員外  
郎母卒不復出經術邃深尤精漢學有周易述補通韻便覽

〔本書略述〕惠氏棟撰周易述闕下經十五卦及序卦雜卦二傳江  
李二氏先後補之凌氏廷堪序江氏周易述補言惠氏猶不免用王  
弼之說江氏則悉無之有過之無不及云云可謂篤論而李氏所附

讀易述札記一字一句具有淵源尤足以闡發惠氏遺蘊其功亦可與江氏約略相亞矣

〔卷目〕（江氏本）（一）周易下經（二）彖下傳（三）象下傳（四）序卦傳雜卦傳（李氏本）（一）鼎震艮漸歸妹豐各卦（二）旅巽隨兌渙節各卦（三）中孚小過既濟未濟各卦（四）序卦傳雜卦傳（五）劄記

尚書今古文注疏 三十卷

〔著者小傳〕孫星衍清陽湖人字淵如乾隆進士歷官山東督糧道引疾歸累主鍾山書院深究經史文字音訓之學旁及諸子百家皆心通其義研精金石碑版工篆隸尤精校勘輯刊平津館叢書岱南閣叢書世稱善本文在六朝漢魏間與同里洪亮吉齊名有尚書今古文注疏周易集解夏小正傳校正魏三體石經殘字考倉頡篇孔子集語史記天官書考證寰宇訪碑錄平津館金石萃編孫氏家藏

書目內外編續古文苑問字堂岱南閣五松園平津館文稿芳茂山

人詩錄

〔本書略述〕漢學家今古文之說以尙書最爲複雜此書之作意在網羅放失舊聞故錄漢魏人佚說爲多內容完善優於江聲尙書集注音疏及王鳴盛尙書後案二書治尙書者先取是書悉心研究明通大義篤守其說庶可不惑於岐趨矣

〔卷目〕(一)堯典(二)皋陶謨(三)禹貢(四)甘誓(五)湯誓(六)盤

庚(七)高宗彤日(八)西伯戡黎(九)微子(十)泰誓(十一)牧誓

(十二)洪範(十三)金縢(十四)大誥(十五)康誥(十六)酒誥

(十七)梓材(十八)召誥(十九)洛誥(二十)多士(二十一)無逸

(二十二)君奭(二十三)多方(二十四)立政(二十五)顧命(二

十六)費誓(二十七)呂刑(二十八)文侯之命(二十九)秦誓

(三十)書序

毛詩傳箋通釋 三十一卷

〔著者小傳〕馬瑞辰清桐城人字元伯嘉慶進士官工部員外郎博綜經學洪楊之難居鄉不屈死有毛詩傳箋通釋

〔本書略述〕毛詩傳箋通釋三十二卷其中徵引古書甚爲賅博皮氏錫瑞謂此書不及陳奐詩毛氏傳疏能專爲毛氏一家之學然陳疏合明堂路寢爲一鍾文烝嘗詆爲新奇繆戾馬氏則篤守古義絕無此武斷之弊是在好學深思之士知所擇取而已

〔卷目〕(一)雜釋(二)周南(三)召南(四)邶(五)鄘(六)(七)衛(八)鄭(九)齊(十)魏(十一)唐(十二)秦(十三)陳(十四)檜(十五)曹(十六)豳(十七)至二十三)小雅(二十四)至二十七)大雅(二十八)至三十)周頌(三十一)魯頌(三十二)商頌

周禮正義 八十六卷

〔著者小傳〕孫詒讓清瑞安人字仲容同治舉人官刑部主事不久

卽引疾歸窮經著書垂四十年有周禮正義墨子閒詁古籀拾遺名  
原古籀餘論契文舉例九旂古通義周書鞫補尙書駢枝大戴禮記  
鞫補六曆甄微廣韻姓氏刊誤經逸札逸述林周禮政要永嘉郡記  
〔本書略述〕此書博采漢唐宋以來迄於清乾嘉諸經儒舊詁互相  
證繹以發鄭注之闕奧補賈疏之遺闕於古制古義疏通證明甚爲  
詳備至近今歐洲政治多與此經冥符而遙契以致富強此又古之  
政教必可行於今者之明效大驗孫氏特於此經發其端而別著周  
禮政要以闡明其說學者苟取此二書參互而研究之其由此而博  
古通今不難矣

〔卷目〕(一至八)天官冢宰第一上(九至十六)天官冢宰第二下  
(十七至二十三)地官司徒第二上(二十四至三十一)地官司徒  
第二下(三十二至四十一)春官宗伯第三上(四十二至五十三)  
春官宗伯第三下(五十四至五十八)夏官司馬第四上(五十九

至六十四)夏官司馬第四下(六十五至六十九)秋官司寇第五上(七十至七十二)秋官司寇第五下(七十四至七十九)冬官考工記第六上(八十至八十六)冬官考工記第六下

### 儀禮正義 四十卷

〔著者小傳〕胡培翬清績溪人字載屏一字竹村嘉慶進士官戶部主事居鄉創立東山書院其學長於禮經閱數十年成儀禮正義一書又有燕寢考研六室文鈔

〔本書略述〕胡氏培翬輯儀禮正義四十卷致力四十餘年實爲一生心血所注自述義例有四曰補注曰申注曰附注曰訂注原稿已佚僅見於羅氏惇衍序中其士昏禮鄉飲酒禮鄉射禮燕禮大射儀五篇因尙未卒業遽歸道山爲及門楊氏大培及族姪肇昕補綴而成此書上推周孔子夏垂絕之惜發明鄭賈得失旁逮鴻儒經生之所議闡發無遺誠爲二千餘年以來絕學治禮者不可不讀之書至

楊氏等所補之處亦能篤守師訓不失家法云

〔卷目〕(一)(二)冠(三)昏(四)相見(五至七)鄉飲(八至十)鄉射  
(十一)(十二)燕(十三至十五)大射(十六至十八)聘(十九)公  
食(二十)覲(二十一至二十五)喪服(二十六至二十八)士喪  
(二十九至三十一)既夕(三十二)(三十三)士虞(三十四至三  
十六) 特牲(三十七)(三十八)少牢(三十九)(四十)有司

禮記訓纂

四十九卷

〔著者小傳〕朱彬清寶應人字武曹號郁甫乾隆舉人少與劉台拱  
齊名從事經傳訓詁聲音文字之學性方正人不敢干以私有經傳  
考證禮記訓纂游道堂詩文集

〔本書略述〕朱氏彬著有經傳考證八卷阮文達公采入皇清經解  
至晚年復著禮記訓纂四十九卷廣撫羣言於郊社樂舞以及月令  
內則諸名物皆一一辯訂即諸子百家可以參攷古制者亦博引無

遺其大學中庸二篇仍依鄭注列經文於次足以正陳澧妄刪古經之謬至訓纂中於前著經傳攷證各條時有改正亦足見學邃心虛不矜創解林文忠則徐序中已詳言之茲不贅列

〔卷目〕(一)(二)曲禮(三)(四)檀弓(五)王制(六)月令(七)曾子

問(八)文王世子(九)禮運(十)禮器(十一)郊特牲(十二)內則(十三)玉藻(十四)明堂位(十五)喪服小記(十六)大傳(十七)少儀(十八)學記(十九)樂記(二十)(二十一)雜記(二十二)喪大記(二十三)祭法(二十四)祭義(二十五)祭統(二十六)經解(二十七)哀公問(二十八)仲尼燕居(二十九)孔子閒居(三十)坊記(三十一)中庸(三十二)表記(三十三)緇衣(三十四)奔喪(三十五)問喪(三十六)服問(三十七)閒傳(三十八)三年問(三十九)深衣(四十)投壺(四十一)儒行(四十二)大學(四十三)冠禮(四十四)昏義(四十五)鄉飲酒義(四十六)射義(四十七)



燕義(四十八)聘義(四十九)喪服四制

春秋左傳詁 二十一卷

〔著者小傳〕洪亮吉清陽湖人字稚存號北江少孤資館穀以養母舉乾隆進士授編修督學貴州嘉慶時以上書指斥戍伊犁尋赦還自號更生居士於書無所不窺尤精輿地學詩文有奇氣其後沈研經史與孫星衍論學相長時稱孫洪有北江全集

〔本書略述〕洪氏亮吉精於春秋之學此編能參互諸家所長一事之疑一辭之異皆貫串全經以折衷之詁解亦極明顯洪氏又有春秋十論載更生齋文集中雖時有創解而無附會牽合之論特附列之以備學者參考

〔卷目〕(一至四)經(五至二十)傳

公羊義疏 七十六卷

〔著者小傳〕陳立清句容人字卓人道光進士官曲靖知府受業於

凌曙劉文淇通許氏說文鄭氏禮而於公羊用力尤深有公羊義疏爾雅舊注白虎通疏證說文諧聲孳生述句溪雜著

〔本書略述〕陳氏少所受學皆名師江都梅氏植之授詩古文詞得其義法儀徵劉氏文淇江都凌氏曙授公羊春秋許氏說文鄭氏禮陳氏兼通之而於公羊用力尤深盡見魏晉以來春秋諸家學說深念春秋之義存於公羊而徐疏簡奧難讀莫得會通乃博稽旁討梳字櫛句成公羊義疏七十六卷雖引徵不免太繁而大義微言多藉以復明於世皮氏錫瑞謂治公羊者當先觀凌曙所注繁露以求董子大義及劉逢祿所作釋例以求何氏條例然後再讀此書以求大備此指示求學門徑之說亦學者所不可不知者也

〔卷目〕(一至九)隱公(十至十六)桓公(十七至二十六)莊公(二十七)閔公(二十八至三十七)僖公(三十八至四十三)文公(四十四至四十九)宣公(五十至五十五)成公(五十六至六十)襄

公(六十一至六十七)昭公(六十八至七十二)定公(七十三至七十五)哀公(七十六)序

穀梁補注 二十四卷

〔著者小傳〕鍾文烝清嘉善人字殿才道光舉人性孝友學問博洽

初治鄭氏三禮通小學後專精春秋有穀梁補注

〔本書略述〕鍾氏崇尚經學尤究心春秋謂穀梁子獨得麟經遺意

范注楊疏於本傳無所發明乃網羅折衷成穀梁補注二十四卷凡

春秋中不決之疑今悉決之其於禘祫祖禴諡法數大端時有未經

人道者全書薈粹衆長斷以新義沈潛反復至二十餘年始出而問

世足成爲一家之言

〔卷目〕(首)序論傳論經(一)(二)隱公(三)(四)桓公(五至八)莊

公閔公(九至十二)僖公(十三)(十四)文公(十五)(十六)宣公

(十七)(十八)成公(十九)(二十)襄公(二十一)(二十二)昭公

(二十三)定公(二十四)哀公

孝經鄭注疏 二卷

〔著者小傳〕鄭玄(見前) 皮錫瑞清善化人號鹿門名所居曰師

伏堂學者稱師伏先生光緒舉人工詩及駢文治經於今古文無所不通篤信公羊改制之說有經學通論尙書大傳疏證今文尙書考證春秋講義王制箋師伏堂駢文詩艸

〔本書略述〕此書意在駁正後儒疑非鄭注之說曾於六藝疏證內論之甚詳實足以闡發高密一家之學至采漢以前徵引孝經者附列於後以證孝經非漢儒僞作尤有功於聖經不淺比之邢疏之依經衍繹度越遠矣

〔卷目〕(上)開宗明義章至孝治章(下)聖治章至喪親章

論語正義 二十四卷

〔著者小傳〕劉寶楠清寶應人字楚楨道光進士歷文安三河知縣

以循良稱於時有論語正義釋穀漢石例寶應圖經愈愚錄詩文集  
〔本書略述〕劉氏寶楠嘗病論語皇邢疏蕪陋蒐輯漢儒舊說益以  
近世諸家及宋人長義爲論語正義一書計二十四卷未卒業命子  
恭寃成之全書義例具見恭寃所述凡例書中採擇各家學說頗爲  
不苟故斷截衆流而大義已皆該括無遺良以淵源有自知之確故  
擇之精也

〔卷目〕(一)學而(二)爲政(三)(四)八佾(五)里仁(六)公冶長  
(七)雍也(八)述而(九)泰伯(十)子罕(十一至十三)鄉黨(十  
四)先進(十五)顏淵(十六)子路(十七)憲問(十八)衛靈公(十  
九)季氏(二十)陽貨(二十一)微子(二十二)子張(二十三)堯  
曰(二十四)序

孟子正義 三十卷

〔著者小傳〕焦循清甘泉人字理堂乾隆舉人不應禮部試閉戶著

書於經無所不治其說易以卦爻經文比例爲主不拘守漢魏師法  
尤推精詣有易章句易通釋易圖略周易補疏孟子正義尙書補疏  
毛詩補疏禮記補疏春秋左傳補疏論語補疏諸書又精天文算術  
著天元一釋開方通釋諸書文學柳宗元有雕菰樓集

〔本書略述〕此書疏趙岐之注兼採近儒數十家之說而以己意折衷合孔孟相傳之正旨梁氏啓超謂考證最精審且能發明大義爲現行各注疏所不能及誠礪論也

〔卷目〕(一)題辭(二)(三)梁惠王上(四)(五)梁惠王下(六)(七)公孫丑上(八)(九)公孫丑下(十)(十一)滕文公上(十二)(十三)滕文公下(十四)(十五)離婁上(十六)(十七)離婁下(十八)(十九)萬章上(二十)(二十一)萬章下(二十二)(二十三)告子上(二十四)(二十五)告子下(二十六)(二十七)盡心上(二十八)(二十九)盡心下(三十)敘

爾雅義疏 二十卷

〔著者小傳〕郝懿行清棲霞人字恂九號蘭皋嘉慶進士官戶部主事潛心著述深於名物訓詁之學有易說書說鄭氏禮記箋爾雅義疏春秋說略春秋比山海經箋疏竹書紀年校正晉宋書故荀子補注記海錯燕子春秋蜂衙小記

〔本書略述〕邵氏晉涵曾以爾雅邢疏淺陋乃別撰正義兼采諸家之註有未詳者摭他書補之至郝氏懿行又以邵氏蒐輯雖廣然聲音訓詁之原尙多壅闕復別撰義疏於字借聲轉處輒反復引伸其說以明其所以然又郝氏田居多年遇艸木蟲魚必詳詢其名詳察其形考之古書以徵其然否凡疏中名物異於舊說者皆經目驗非憑胸臆蓋郝氏一生學問用力於爾雅最久稿凡數易垂歿始成其所造之深實非邵氏所能及也

〔卷目〕(上之一)釋詁上(上之又一)釋詁下(上之二)釋言(上之

(三) 釋訓(上之四) 釋親(中之一) 釋宮(中之二) 釋器(中之三)  
釋樂(中之四) 釋天(中之五) 釋地(中之六) 釋丘(中之七) 釋山  
(中之八) 釋水(下之一) 釋草(下之二) 釋木(下之三) 釋蟲(下  
之四) 釋魚(下之五) 釋鳥(下之六) 釋獸(下之七) 釋畜

## 四書集注 十九卷

〔著者小傳〕朱熹宋婺源人字元晦一字仲晦登紹興進士第歷事  
高孝光寧四朝官至寶文閣待制慶元中致仕旋卒嘉泰初謚文寶  
慶中贈太師追封信國公自稱雲谷老人亦曰晦翁晚卜築於建陽  
之考亭爲講學之所朱學因稱考亭學派其學出於李侗羅從彥盡  
得程氏之傳大抵窮理以致其知反躬以踐其實而以居敬爲主所  
著有易本義啓蒙著卦考誤詩集傳大學中庸章句或問論語孟子  
集注太極圖通書西銘解楚辭集注辨證韓文考異晦庵集所編次  
有論孟集義孟子指要中庸輯略孝經刊誤小學書通鑑綱目宋名



臣言行錄家禮近思錄河南程氏遺書伊洛淵源錄淳祐時從祀孔廟清康熙中升位於十哲之次

〔四庫提要〕大學章句一卷論語集註十卷孟子集註七卷中庸章句一卷宋朱子撰案論語自漢文帝時立博士孟子據趙岐題詞文帝時亦嘗立博士以其旋罷故史不載中庸說二篇見漢書藝文志戴顛中庸傳二卷梁武帝中庸講疏一卷見隋書經籍志惟大學自唐以前無別行之本然書錄解題載司馬光有大學廣義一卷中庸廣義一卷已在二程以前均不自洛閩諸儒始爲表章特其論說之詳自二程始定著四書之名則自朱子始耳原本首大學次論語次孟子次中庸書肆刊本以大學中庸篇頁無多併爲一冊遂移中庸於論語前明代科舉命題又以作者先後移中庸於孟子前然非宏旨所關不必定復其舊也大學古本爲一篇朱子則分別經傳顛倒其舊次補綴其闕文中庸亦不從鄭註分節故均謂之章句論語孟

子融會諸家之說故謂之集註猶何晏註論語袁八家之說稱集解也惟晏註皆標其姓朱子則或標或不標例稍殊焉大學章句諸儒頗有異同然所謂誠其意者以下竝用舊文所特勑者不過補傳一章要非增於八條目外既於理無害又於學者不爲無裨何必分門角逐歟中庸雖不從鄭註而實較鄭註爲精密蓋考證之學宋儒不及漢儒義理之學漢儒亦不及宋儒言豈一端要各有當況鄭註之善者如戒慎乎其所不睹四句未嘗不採用其意雖有其位一節又未嘗不全襲其文觀其去取具有鑒裁尤不必定執古義以相爭也論語孟子亦頗取古註如論語瑚璉一條與明堂位不合孟子曹交一註與春秋傳不合論者或以爲疑不知瑚璉用包咸註曹交用趙岐註非朱子杜撰也又如夫子之牆數仞註七尺曰仞掘井九仞註八尺曰仞論者尤以爲矛盾不知七尺亦包咸註八尺亦趙岐註也是知鎔鑄羣言非出私見苟不詳考所出固未可槩目以師心矣大

抵朱子平生精力殫於四書其剖析疑似辨別毫釐實遠在易本義詩集傳上讀其書者要當於大義微言求其根本明以來攻朱子者務撫其名物度數之疎尊朱子者又併此末節而回護之是均門戶之見烏識朱子著書之意乎

〔卷目〕大學一卷 中庸一卷 論語十卷 孟子七卷

說文解字真本 十五卷

〔著者小傳〕許慎後漢汝南召陵人字叔重官至太尉南閣祭酒性淳篤少博學經籍馬融嘗推敬之時人語曰五經無雙許叔重著說文解字十四篇推究六書之義分部類從至爲精密後世言小學者多宗之嘗爲涪長故亦稱涪長或稱南閣祭酒

〔四庫提要〕漢許慎撰慎字叔重汝南人官至太尉南閣祭酒是書成於和帝永元十二年凡十四篇合目錄一篇爲十五篇分五百四十部爲文九千三百五十三重文一千一百六十三註十三萬三千

四百四十字推究六書之義分部類從至爲精密而訓詁簡質粹不易通又音韻改移古今異讀諧聲諸字亦每難明故傳本往往譌異宋雍熙三年詔徐鉉葛湍王惟恭句中正等重加刊定凡字爲說文註義序例所載而諸部不見者悉爲補錄又有經典相承時俗要用而說文不載者亦皆增加別題之曰新附字其本有正體而俗書譌變者則辨於註中其違戾六書者則別列卷末或註義未備更爲補釋亦題臣鉉等案以別之音切則一以孫愐唐韻爲定以篇帙繁重每卷各分上下卽今所行毛晉刊本是也明萬曆中宮氏刻李燾說文五音韻譜陳大科序之誤以爲卽鉉校本陳啓源作毛詩稽古編顧炎武作日知錄並沿其謬豈毛氏所刊國初猶未盛行歟書中古文籀文李燾據唐林罕之說以爲晉愷令呂忱所增考慎自序云今序篆文合以古籀其語甚明所記重文之數亦復相應又法書要錄載後魏江式論書表曰晉世義陽王典祠令任城呂忱表上字林六

卷尋其況趣附託許慎說文而按偶章句隱別古籀奇惑之字文得正隸不差篆意則忱書並不用古籀亦有顯證如罕之所云呂忱字林多補許慎遺闕者特廣說文未收字耳其書今雖不傳然如廣韻一東部炯字銜字四江部噉字之類云出字林者皆說文所無亦大略可見肅以說文古籀爲忱所增誤之甚矣自魏晉以來言小學者皆祖慎至李陽冰始曲相排斥未協至公然慎書以小篆爲宗至於隸書行書艸書則各爲一體孳生轉變時有異同不悉以小篆相律故顏元孫干祿字書曰自改篆行隸漸失其真若總據說文便下筆多礙當去泰去甚使輕重合宜徐鉉進說文表亦曰高文大冊則宜以篆籀著之金石至於常行簡牘則艸隸足矣二人皆精通小學而持論如是明黃諫作从古正文一切以篆改隸豈識六書之旨哉至其所引五經文字與今本多不相同或往往自相違異顧炎武日知錄嘗撫其汜下作江有汜漚下又作江有漚登下作赤鳥已已擊下

又作赤烏擊擊是所云詩用毛氏者亦與今本不同蓋雖一家之學而支派既別亦各不相合好奇者或據之以改經則謬戾殊甚能通其意而又能不泥其迹庶乎爲善讀說文矣

〔卷目〕全書十五卷各分上下

說文繫傳

四十卷附校勘記三卷

〔著者小傳〕徐鍇南唐廣陵人鉉弟字楚金四歲而孤母方教鉉未暇及鍇能自知書中主李景見其文以爲祕書省正字累官右內史舍人李穆使江南見其兄弟文章歎曰二陸不能及也善小學李氏失德國勢日蹙鍇憂憤卒有說文繫傳說文解字韻語

〔四庫提要〕南唐徐鍇撰鍇字楚金廣陵人官至右內史舍人宋兵下江南卒於圍城之中事蹟具南唐書本傳是書凡八篇首通釋三十卷以許慎說文解字十五篇篇析爲二凡鍇所發明及徵引經傳者悉加臣鍇曰及臣鍇案字以別之繼以部敘二卷通論三卷祛妄

類聚錯綜疑義系述各一卷祛妄斥李陽冰臆說疑義舉說文偏旁  
所有而闕其字及篆體筆畫相承小異者部敘擬易序卦傳以明說  
文五百四十部先後之次類聚則舉字之相比爲義者如一二三四  
之類錯綜則旁推六書之旨通諸人事以盡其意終以系述則猶史  
記之自敘也錯嘗別作說文篆韻譜五卷宋孝宗時李燾因之作說  
文解字五音譜燾自序有曰韻譜當與繫傳並行今韻譜或刻諸學  
官而繫傳迄莫光顯余蒐訪歲久僅得其七八闕卷誤字無所是正  
每用太息則繫傳在宋時已殘闕不完矣今相傳僅有鈔本錢曾讀  
書敏求記至詫爲驚人祕笈然脫誤特甚卷末有熙寧中蘇頌記云  
舊闕二十五三十共二卷俟別求補寫此本卷三十不闕或續得之  
以補入卷二十五則直錄其兄鉉所校之本而去其新附之字殆後  
人求其原書不獲因撫鉉書以足之猶之魏書佚天文志以張太素  
書補之也其餘各部闕文亦多取鉉書竄入考鉉書用孫愐唐韻而

錯書則朝散大夫行祕書省校書郎朱翺別爲反切鉉書稱某某切而錯書稱反今書內音切與鉉書無異者其訓釋亦必無異其移掇之迹顯然可見至示部竄入鉉新附之祧袄祚三字尤鑿鑿可證者錯編篇末其文亦似未完無可採補則竟闕之矣此書成於鉉書之前故鉉書多引其說然亦時有同異如鉉本福祐也此作備也鉉本莖耕多艸此作耕名鉉本述前頓也此作前頓也鉉本鷄大鷄也此從爾雅作天鷄也又鉉本榮字下引禮記禡字下引詩之類此作臣錯案禮記曰臣錯案詩曰則錯所引而鉉本淆入許氏者甚多又如鬯字下云闕此作家本無注臣錯案疑許慎子許沖所言也是鉉直刪去家本無注四字改用一闕字矣其憑臆刪改非賴此書之存何以證之哉此書本出蘇頌所傳篆文爲監察王聖美翰林祇候劉允恭所書卷末題子容者卽頌字也乾道癸巳尤袤得於葉夢得家寫以與李燾詳見袁跋書中有稱臣次立案者張次立也次立官至殿



中丞嘗與寫嘉祐二字石經陶宗儀書史會要載其始末云

〔卷目〕(一至三十)通釋(三十一)(三十二)部敘(三十三至三十

五)通論(三十六)祛妄(三十七)類聚(三十八)錯綜(三十九)

疑義(四十)系述附校勘記上中下三卷

### 說文解字段注

三十卷附六書音韻表二卷

〔著者小傳〕段玉裁清金壇人字若膺一字懋堂乾隆舉人官巫山

知縣引疾歸師休寧戴震講求古義尤精小學有說文解字注六書

音韻表周禮漢讀考儀禮漢讀考古文尙書撰異毛詩詁訓傳經韻

樓集等書

〔本書略述〕經以載道而所以明道者辭所以成辭者字故未有不

通聲音訓詁而能治經者金壇段氏玉裁爲戴東原先生高第弟子

博覽周秦兩漢以及諸家小學之書積數十年精力成說文解字注

三十卷六書音韻表二卷以鼎臣之本頗有更改不若楚金爲不失

許氏之舊顧其中尚有爲後人竄易及遺漏失次之處乃一一考而復之引證詳確不同臆造匪特爲祭酒之功臣而有益於經訓者厥功尤大附表二卷足供研究古音部類參考誠爲治說文者入門最要之書也

〔卷目〕全書三十卷附六書音韻表二卷

說文通檢 十四卷 附部目及疑字

〔著者小傳〕黎永椿清番禺人爲陳蘭甫先生弟子

〔本書略述〕此書專爲緝檢說文而設極便初學檢查之法見黎氏自述凡例遠勝於毛謨說文檢字因毛書祇能檢汲古本也

〔卷目〕共十四卷各分上下首附部目末附疑字

玉篇 三十卷

〔著者小傳〕顧野王陳吳人字希馮於天文地理卜筮占候蟲篆奇字無所不通又善丹青與王褒同爲梁宣城王賓客梁亡入陳天嘉

初補撰史學士仕終黃門侍郎光祿卿有玉篇輿地志符瑞圖分野  
樞要續洞冥記玄象表文集

〔四庫提要〕梁大同九年黃門侍郎兼太學博士顧野王撰唐上元  
元年富春孫強增加字宋大中祥符六年陳彭年吳銳邱雍等重修  
凡五百四十二部今世所行凡三本一爲張士俊所刊前有野王序  
一篇啓一篇後有神珙反紐圖及分毫字樣朱彝尊序之稱上元本  
一爲曹寅所刊與張本一字無異惟前多大中祥符敕牒一道稱重  
修本一爲明內府所刊字數與二本同而每部之中次序不同註文  
稍略亦稱大中祥符重修本案文獻通考載玉篇三十卷引晁公武  
讀書志曰梁顧野王撰唐孫強又嘗增字釋神珙反紐圖附於後又  
載重修玉篇三十卷引崇文總目曰翰林學士陳彭年與史館校刊  
吳銳直集賢院邱雍等重加刊定是宋時玉篇原有二本彭年等進  
書表稱肅奉詔條俾從詳閱譌謬者悉加刊定膚淺者仍事討論其

敕牒後所列字數稱舊一十五萬八千六百四十一言新五萬一千一百二十九言新舊總二十萬九千七百七十言註四十萬七千五百有三十字是彭年等大有增刪已非孫強之舊故明內府本及曹本均稱重修張本既與曹本同則亦重修本矣乃刪去重修之牒詭稱上元本而大中祥符所改大廣益會之名及卷首所列字數仍未及削改可謂拙於作僞彝尊序乃謂勝於今行大廣益本殆亦未見所刊而以意漫書歟元陸友研北雜志稱顧野王玉篇惟越本最善末題會稽吳氏三一孃寫楷法殊精又考永樂大典每字之下皆引顧野王玉篇云云又引宋重修玉篇云云二書竝列是明初上元本猶在而其篇字韻中所載玉篇全部乃仍收大廣益會本而不收上元舊本顧孫原帙遂不可考殆以重修本註文較繁故以多爲貴耶當時編纂之無識此亦一端矣卷末所附沙門神珙五音聲論及四聲五音九弄反紐圖爲言聲韻者所祖近時休寧戴氏作聲韻攷力

辯反切始魏孫炎不始神珙其說良是至謂唐以前無字母之說神珙字母乃剽竊儒書而託詞出於西域則殊不然攷隋書經籍志稱婆羅門書以十四音貫一切字漢明帝時與佛經同入中國則遠在孫炎前又釋藏譯經字母自晉僧伽婆羅以下可攷者尙十二家亦遠在神珙前蓋反切生於雙聲雙聲生於字母此同出於喉吻之自然華不異梵梵不異華者也中國以雙聲取反切西域以字母統雙聲此各得於聰明之自悟華不襲梵梵不襲華者也稽其源流具有端緒特神珙以前自行於彼教神珙以後始流入中國之韻書亦如利瑪竇後推步測驗參用西法耳豈可謂歐羅巴書全剽竊洛下鮮于之舊術哉戴氏不究其本徒知神珙在唐元和以後遂據其末而與之爭欲以求勝於彼教不知聲音之學西域實爲專門儒之勝於釋者別自有在不必爭之於此也

〔卷目〕(一至十)爲上(十一至二十)爲中(二十一至三十)爲下

廣韻 五卷 附校札

〔著者小傳〕陳彭年宋南城人字永年幼好學年十三著皇綱論萬餘言爲文師事徐鉉中雍熙進士第仕至兵部侍郎深爲真宗所倚任卒謚文僖所著有文集百卷唐紀四十卷嘗奉勅與丘雍重修廣韻 丘雍（未詳）

〔四庫提要〕重修廣韻五卷宋陳彭年邱雍等奉勅撰初隋陸法言以呂靜等六家韻書各有乖互因與劉臻顏之推魏淵盧思道李若蕭該辛德源薛道衡八人撰爲切韻五卷書成於仁壽元年唐儀鳳二年長孫訥言爲之註後郭知元關亮薛峒王仁煦祝尙邱遞有增加天寶十載陳州司法孫愐重爲刊定改名唐韻後嚴寶文裴務齊陳道固又各有添字宋景德四年以舊本偏旁差譌傳寫漏落又註解未備乃命重修大中祥符四年書成賜名大宋重修廣韻卽是書也舊本不題撰人以丁度集韻考之知爲彭年雍等爾其書二百六

韻仍陸氏之舊所收凡二萬六千一百九十四字考唐封演聞見記載陸法言韻凡一萬二千一百五十八字則所增凡一萬四千三十六字矣此本爲蘇州張士俊從宋槧翻雕中閒已闕欽宗諱蓋建炎以後重刊朱彝尊序之力斥劉淵韻合殷於文合隱於吻合焮於問之非然此本實合殷隱焮於文吻問彝尊未及檢也註文凡一十九萬一千六百九十二字較舊本爲詳而冗漫頗甚如公字之下載姓氏至千餘言殊乏翦裁東字之下稱東宮得臣爲齊大夫亦多紕繆考孫愐唐韻序稱異聞奇怪傳說姓氏原田土地物產山河草木禽獸蟲魚備載其閒已極蔓引彭年等又從而益之宜爲丁度之所譏潘耒序乃以註文繁複爲可貴是將以韻書爲類書也著書各有體例豈可以便於剽剗遂推爲善本哉流傳旣久存以備韻書之源流可矣

〔卷目〕上平下平上聲去聲入聲各一卷附校札

集韻十卷

〔著者小傳〕丁度宋晉陵人字公雅大中祥符中登服勤詞學科仁宗時累官至端明殿學士尙書左丞卒謚文簡有邇英聖覽龜鑑精義編年總錄武經總要集韻附釋文互注禮部韻略貢舉條式

〔四庫提要〕舊本題宋丁度等奉敕撰前有韻例稱景祐四年太常博士直史館宋祁太常丞直史館鄭戩等建言陳彭年邱雍等所定廣韻多用舊文繁略失當因詔祁戩與國子監直講賈昌朝王洙同加修定刑部郎中知制誥丁度禮部員外郎知制誥李淑爲之典領晁公武讀書志亦同然考司馬光切韻指掌圖序稱仁宗皇帝詔翰林學士丁公度李公淑增崇韻學自許叔重而降凡數十家總爲集韻而以賈公昌朝王公洙爲之屬治平四年余得旨繼纂其職書成上之有詔頒焉嘗因討究之暇科別清濁爲二十圖云云則此書奏於英宗時非仁宗時成於司馬光之手非盡出丁度等也其書凡平



聲四卷上聲去聲入聲各二卷共五萬三千五百二十五字視廣韻

增二萬七千三百三十一字

案廣韻凡二萬六千一百九十四字應增二萬七千三百三十一字於數乃合

原本誤以二萬爲一萬今改正

熊忠韻會舉要稱舊韻但作平聲一二三四集韻乃

改爲上下平今檢其篇目乃舊韻作上下平此書改爲平聲一二三

四忠之所言殊爲倒置惟廣韻所註通用獨用封演聞見記稱爲唐

許敬宗定者改併移易其舊部則實自此書始東齋記事稱景祐初

以崇政殿說書賈昌朝言詔度等改定韻窄者十三處許令附近通

用是其事也今以廣韻互校平聲併殷於文併嚴於鹽添併凡於咸

銜上聲併隱於吻去聲併廢於隊代併焮於問入聲併迄於物併業

於葉帖併乏於洽狎凡得九韻不足十三然廣韻平聲鹽添咸銜嚴

凡與入聲葉帖洽狎業乏皆與本書部分相應而與集韻互異惟上

聲併儼於琰忝併范於躡檻去聲併醜於豔忝併梵於陷鑑皆與本

書部分不應而乃與集韻相同知此四韻亦集韻所併而重刊廣韻

者誤據集韻以校之遂移其舊第耳其駁廣韻註凡姓望之出廣陳名系既乖字訓復類譜牒誠爲允協至謂兼載他切徒釀細文因併刪其字下之互註則音義俱別與義同音異之字難以遽明殊爲省所不當省又韻主審音不主辨體乃篆籀兼登雅俗竝列重文複見有類字書亦爲繁所不當繁其於廣韻蓋亦互有得失故至今二書竝行莫能偏廢焉

〔卷目〕(一至四)平聲(五)(六)上聲(七)(八)去聲(九)(十)入聲

### 小爾雅義證

十三卷

〔著者小傳〕胡承珙清涇人字景孟號墨莊嘉慶進士官至臺灣兵備道究心經術有毛詩後箋儀禮古今文疏義小爾雅義證爾雅古義求是堂詩文集

〔本書略述〕小爾雅原本不傳今存孔叢子中世多謂爲僞書胡氏初亦疑其僞後始斷以爲真乃著義證十三卷其大略詳自序中又

取東原戴氏所疑四條一一辨釋具載本書蓋先生致力漢學而於六書訓詁尤爲專長故能援引博洽推闡精鑿以執後儒之訾議也

〔卷目〕(一)廣詁(二)廣言(三)廣訓(四)廣義(五)廣名(六)廣服

(七)廣器(八)廣物(九)廣鳥(十)廣獸(十一)廣度(十二)廣量

(十三)廣衡

方言疏證 十三卷

〔著者小傳〕揚雄漢成都人字子雲少好學不爲章句訓詁博覽無

所不見爲人簡易佚蕩口吃不能劇談好深湛之思奏甘泉河東長

楊等賦多仿司馬相如後仕於王莽朱子綱目稱莽大夫所著有太

玄法言方言等書 戴震清休寧人字東原乾隆舉人精研漢儒傳

注及說文諸書四庫館開薦充纂修賜同進士出身授庶吉士旋以

積勞卒官有詩經二南補注毛鄭詩考正考工記圖孟子字義疏證

方言疏證原善原象句股割圍記策算聲韻考聲類表儀禮正誤爾

雅文字考屈原賦注九章補圖古曆考曆問水地記東原文集等書  
所校大戴禮記水經注尤精核

〔本書略述〕方言十三卷舊本題漢揚雄撰晉郭璞註已見四庫著  
錄略稱考晉書郭璞傳有註方言之文而漢書揚雄傳備列所著之  
書不及方言一字藝文志亦惟小學有雄訓纂一篇儒家有雄所序  
三十八篇註云太玄十九法言十三樂四箴二雜賦有雄賦十二篇  
皆無方言東漢一百九十年中亦無稱雄作方言者至漢末應劭風  
俗通義序始稱周秦常以歲八月遣韜軒之使求異代方言還奏籍  
之藏於祕室及嬴氏之亡遺棄脫漏無見之者蜀人嚴君平有千餘  
言林閩翁孺才有梗概之法揚雄好之天下孝廉衛卒交會周章質  
問以次注續二十七年爾乃治正凡九千字又劭注漢書亦引揚雄  
方言一條是稱雄作方言實自劭始魏晉以後諸儒轉相沿述皆無  
異詞惟宋洪邁容齋隨筆始考證漢書斷非雄作然邁所摘劉歆與

雄往返書中既稱在成帝時不應稱孝成皇帝一條及東漢明帝始諱莊不應西漢之末卽稱莊遵爲嚴君平一條則未深中其要領考書首成帝時云云乃後人題下標注之文傳寫舛譌致與書連爲一實非歆之本詞文義尙釐然可辨書中載揚莊之名不作嚴字實未嘗預爲明帝諱其嚴君平字或後人傳寫追改亦未可知皆不足斷是書之僞惟後漢許慎說文解字多引雄說而其文皆不見於方言又慎所注字義與今方言相同者不一而足而皆不標揚雄方言字知當慎之時此書尙不各方言亦尙不以方言爲雄作故馬鄭諸儒未嘗稱述至東漢之末應劭始有是說魏孫炎註爾雅莫貊螳螂蝥字晉杜預註左傳授師子焉句始遞相徵引沿及東晉郭璞遂註其書後儒稱揚雄方言蓋由於是然劭序稱方言九千字而今本乃一萬一千九百餘字則字數較原本幾溢三千雄與劉歆往返書皆稱方言十五卷郭璞序亦稱三五之篇而隋志唐志乃並載揚雄方言

十三卷與今本同則卷數較原本闕其二均爲抵牾不合考雄荅歆書稱語言或交錯相反方復論思詳悉集之如可寬假延期必不敢有愛云云疑雄本有此未成之書歆借觀而未得故七略不載漢志亦不著錄後或侯芭之流收其殘藁私相傳述閱時既久不免於輒轉附益如徐鉉之增說文故字多於前厥後傳其學者以漢志無方言之名恐滋疑竇而小學家有別字十三篇不著撰人名氏可以假借影附證其實出於雄遂併爲一十三卷以就其數故卷減於昔歟反覆推求其真僞皆無顯據姑從舊本仍題雄名亦疑以傳疑之義也雄及劉歆二書據李善文選注引懸諸日月不刊之書句已稱方言則自隋唐以來原附卷末今亦仍之其書世有刊本然文字古奧訓義深隱校讎者猝不易詳故斷爛譌脫幾不可讀錢曾讀書敏求記嘗據宋槧駁正其誤然曾家宋槧今亦不傳惟永樂大典所收猶爲完善檢其中秦有榛娥之臺一條與錢曾所舉相符知卽從宋本

錄入今取與近本相校始知明人妄行改竄顛倒錯落全失其初不止錢曾所舉之一處是書雖存而實亡不可不亟爲釐正謹參互考訂凡改正二百八十一字刪衍文十七字補脫文二十七字神明燠然頓還舊觀併逐條援引諸書一一疏通證明具列案語庶小學訓詁之傳尙可以具見崖略併以糾坊刻之謬俾無迷誤後來舊本題曰輶軒使者絕代語釋別國方言其文冗贅故諸家援引及史志著錄皆省文謂之方言舊唐書經籍志則謂之別國方言實卽一書又容齋隨筆稱此書爲輶軒使者絕域語釋別國方言以代爲域其文獨異然諸本竝作絕代書中所載亦無絕域重譯之語洪邁所云蓋偶然誤記今不取其說焉

以上四庫提要語

此本係清戴震廣搜羣籍之引

用方言及注者交互參訂計改正訛字二百八十一補脫字二十七刪衍字十七其詮釋處多據古義推闡亦極精鑿爲治經讀史及研究文學小學者不可不備之書

〔卷目〕原書十三卷不分目

廣雅疏證 十卷

〔著者小傳〕張揖魏清河人字稚讓太和中爲博士 王念孫清高郵人字懷祖學者稱石臞先生乾隆進士官至永定河道少受業於休寧戴震其分古韻爲二十一部按之羣經楚辭斬然不紊說者謂段顧諸家所未及通聲音文字訓詁之學撰廣雅疏證尤精於校讎著讀書雜志正古書傳寫之誤

〔本書略述〕廣雅疏證十卷魏張揖撰已見四庫著錄略稱後魏江式論書表曰魏初博士清河張揖著埤倉廣雅古今字詁究諸埤倉增長事類抑亦於文爲益者也然其字詁方之許篇或得或失矣是式謂埤倉廣雅勝於字詁今埤倉字詁皆久佚惟廣雅存其書因爾雅舊目博採漢儒箋註及三蒼說文諸書以增廣之於揚雄方言亦備載無遺隋祕書學士曹憲爲之音釋避煬帝諱改名博雅故至今



二名竝稱實一書也前有揖進表稱凡萬八千一百五十文分爲上

中下隋書經籍志亦作三卷與表所言合然註曰梁有四卷唐志亦

作四卷館閣書目又云今逸但存音三卷憲所註本隋志作四卷唐

志則作十卷卷數各參錯不同蓋揖書本三卷七錄作四卷者由後

來傳寫析其篇目憲註四卷卽因梁代之本後以文句稍繁析爲十

卷又嫌十卷煩碎復併爲三卷觀諸家所引廣雅之文皆具在今本

無所佚脫知卷數異而書不異矣然則館閣書目所謂逸者乃逸其

無註之本所謂存音三卷者卽憲所註之本揖原文實附註以存未

嘗逸亦未嘗闕惟今本仍爲十卷則又後人析之以合唐志耳考唐

元度九經字樣序稱音字改反爲切實始於唐開成閒憲雖自隋入

唐至貞觀時尚在然遠在開成以前今本乃往往云某字某切頗爲

疑竇殆傳刻臆改又非憲本之舊歟

以上四庫提要語

此本係清王念孫疏

證先生精通文字聲音訓詁之學官御史時注釋廣雅日以三字爲

率積十年而成書名曰廣雅疏證原書字之譌者五百八十脫者四百九十衍者三十九失次者百二十三正文誤入音內者十九音內誤入正文者五十七皆隨條補正詳舉所由其涉於漢以前倉雅古訓復搜括而通證之說者比諸酈道元注水經注優於經段氏懋堂亦謂讀疏證如入武陵桃源取徑幽深而其中曠朗講明經義不取鑿空之談亦不爲株守之見惟其義之平允而已

〔卷目〕(一上至四下)釋詁(五上)(五下)釋言(六上)釋訓(六下)釋親(七上)釋宮(七下)(八上)釋器(八下)釋樂(九上)釋天(九下)釋地釋丘釋山釋水(十上)釋草釋木(十下)釋蟲釋魚釋鳥釋獸釋畜

### 春秋繁露 十七卷 附附錄

〔著者小傳〕董仲舒漢廣川人少治春秋下帷講授三年不窺園武帝時以賢良對天人三策爲江都相後爲膠西王相以病免仲舒學

有源委嘗言仁人正其誼不謀其利明其道不計其功爲漢醇儒有春秋繁露及文集

〔四庫提要〕漢董仲舒撰繁或作蕃蓋古字相通其立名之義不可

解中興館閣書目謂繁露寃之所垂有聯貫之象春秋比事屬辭立名或取諸此亦以意爲說也其書發揮春秋之旨多主公羊而往往及陰陽五行考仲舒本傳蕃露玉杯竹林皆所著書名而今本玉杯竹林乃在此書之中故崇文總目頗疑之而程大昌攻之尤力今觀其文雖未必全出仲舒然中多根極理要之言非後人所能依託也是書宋代已有四本多寡不同至樓鑰所校乃爲定本鑰本原闕三篇明人重刻又闕第五十五篇及第五十六篇首三百九十八字第七十五篇中一百七十九字第四十八篇中二十四字又第二十五篇顛倒一頁遂不可讀其餘譌脫不可勝舉蓋海內藏書之家不見完本三四百年於茲矣今以永樂大典所存樓鑰本詳爲勘訂凡補

一千一百二十一字刪一百二十一字改定一千八百二十九字神明煥然頓還舊笈雖曰習見之書實則絕無僅有之本也倘非幸遇聖朝右文稽古使已湮舊籍復發幽光則此十七卷者竟終沈於蠹簡中矣豈非萬世一遇哉

〔卷目〕(一)楚莊王第一玉杯第二(二)竹林第三(三)玉英第四精華第五(四)王道第六(五)滅國上第七至重政第十三(六)服制象第十四至保位權第二十(七)考功名第二十一至服制第二十六(八)度制第二十七至必仁且知第三十(九)身之養第三十一至奉本第三十四(十)深察名號第三十五至闕文第四十(十一)爲人者天第四十一至陰陽位第四十七(十二)陰陽終始第四十八至闕文第五十四(十三)四時之副第五十五至治水五行第六十一(十四)治亂五行第六十二至郊語第六十五(十五)郊義第六十六至郊事對第七十一(十六)執贄第七十二至循天之道第

七十七(十七)天地之行第七十八至天道施第八十二附附錄

經義考 三百卷

〔著者小傳〕朱彝尊清秀水人字錫鬯號竹垞又號醜舫晚稱小長蘆釣魚師少肆力古學博極羣書康熙中舉鴻博授檢討與修明史體例多從其議引疾罷歸其學長於考證工古文詩與王士禛稱南北兩大宗又好爲詞與陳維崧稱朱陳卒年八十一著有曝書亭全集又輯有經義考明詩綜詞綜日下舊聞等書

〔四庫提要〕國朝朱彝尊撰彝尊字錫鬯號竹垞秀水人康熙己未薦舉博學鴻詞召試授檢討入直內廷彝尊文章淹雅初在布衣之內已與王士禛聲價相齊博識多聞學有根柢復與顧炎武閻若璩顏頤上下凡所撰述具有本原是編統考歷朝經義之目初名經義存亡考惟列存亡二例後分例曰存曰闕曰佚曰未見因改今名凡御注敕撰一卷易七十卷書二十六卷詩二十二卷周禮十卷儀禮

八卷禮記二十五卷通禮四卷樂一卷春秋四十三卷論語十一卷  
孝經九卷孟子六卷爾雅二卷羣經十三卷四書八卷逸經三卷  
緯五卷擬經十三卷承師五卷宣講立學共一卷刊石五卷書壁鏤  
版著錄各一卷通說四卷家學自述各一卷其宣講立學家學自述  
三卷皆有錄無書蓋撰輯未竟也每一書前列撰人姓氏書名卷數  
其卷數有異同者則註某書作幾卷次列存佚闕未見字次列原書  
序跋諸儒論說及其人之爵里彝尊有所考正者卽附列案語於末  
雖序跋諸篇與本書無所發明者連篇備錄未免少冗又隋志著錄  
凡於全經之內專說一篇者如易類之繫辭註乾坤義書類之洪範  
五行傳古文彞典禮類之夏小正月令章句中庸傳等皆與說全經  
者通敘先後俾條貫易明彝尊是書乃以專說一篇者附錄全經之  
末遂令時代參錯於例亦爲未善然上下二千年閒元元本本使傳  
經原委一一可稽亦可以云詳贍矣至所註佚闕未見今以四庫所

錄校之往往其書具存彝尊所言不盡可據然冊府儲藏之祕非人  
閱所得盡窺又恭逢我皇上稽古右文蒐羅遺逸鄉嬛異笈宛委珍  
函莫不乘時畢集圖書之富曠古所無儒生株守殘編目營掌錄窮  
一生之力不能測學海之津涯其勢則然固不足爲彝尊病也

〔卷目〕(一)御注敕撰(二至七十一)易(七十二至九十七)書(九  
十八至一百十九)詩(一百二十至一百二十九)周禮(一百三十  
至一百三十七)儀禮(一百三十八至一百六十二)禮記(一百六  
十三至一百六十六)通禮(一百六十七)樂(一百六十八至二百  
十)春秋(二百一十一至二百二十一)論語(二百二十二至二百三  
十)孝經(二百三十一至二百三十六)孟子(二百三十七)(二  
百三十八)爾雅(二百三十九至二百五十一)羣經(二百五十二  
至二百五十九)四書(二百六十至二百六十二)逸經(二百六十  
三至二百六十七)毖緯(二百六十八至二百八十)擬經(二百八

十一至二百八十五) 承師(二百八十六) 闕(二百八十七至二百九十一) 刊石(二百九十二) 書壁(二百九十三) 鏤板(二百九十四) 著錄(二百九十五至二百九十八) 通說(二百九十九)  
(三百) 闕

### 經義述聞 三十一卷

〔著者小傳〕王引之清高郵人字伯申念孫子嘉慶進士有經義述聞經傳釋詞等書累官工部尚書卒諡文簡

〔本書略述〕高郵王氏父子以精通訓詁著稱此書係文簡述過庭所聞日積月累編成三十二卷分易書詩周官儀禮大小戴記春秋內外傳公羊穀梁傳爾雅而殿以通說時有觸類旁通之處凡經中諸說並列則求其是字有段借則改其讀蓋熟於漢學之門戶而能不囿於漢學之藩籬者其精博實與惠戴二家並峙

〔卷目〕(一)(二)周易(三)(四)尚書(五至七)毛詩(八)(九)周官



(十)儀禮(十一至十三)大戴禮記(十四至十六)禮記(十七至十九)春秋左傳(二十)(二十一)國語(二十二)(二十三)春秋名字解詁(二十四)春秋公羊傳(二十五)春秋穀梁傳(二十六至二十八)爾雅(二十九)(三十)太歲考(三十一)(三十二)通

說

